

KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM

Kotava, tela tamefa golerava
Va ina kosmac !!

Taneaksat ke 2024


15^e otuk





1850 !

Blira sareon gu taneaf kelot



Blira sareon gu taneaf kelot...

1. *Vuntoya wida koeEuropa*
2. *Jiomaik ke taway*
3. *Lanison ok lakison ok kan kelot*
4. *Gantatota blid !!*
5. *Flintik ke kawoda*
6. *Foalk ta askira va kotcoba*
7. *Dodelikeem ke gasta*
8. *Yambudik is mawaf kobasik*
9. *Onyik is krupakirik*
10. *Tamava ke erba*
11. *Yon celemoy widavik*
12. *Rude ke kulik is azekor ke wawik*
13. *Sutuca ke akolik*
14. *Puve ke uti is koyutara*
15. *Decem-celemoy rumeik a bema*
16. *Nudafa vefara is tamava dem vefasiki*
17. *Nyelik ke abduxoa*
18. *Toza ke sanef feleem*
19. *Gozasik ke taneaviel*
20. *Bowesikeem is bowenikeem*
21. *Grabas ujeem*
22. *Ervolia va azaka kosmad*
23. *Artowasik tegid*

Vuntoya wida koe Europa

Alub-decemoya tanda ke izva tid wali breizaf tawadayik is *mujik* widik ke rossiaf rijust. Bat tir nuyik mali tena ke Mialukugal. Ban bak 1850 zavzar levetirik peyan gan jiomaik is dile gokobas remi tev-sanoy bartiv fuxe viel bak idulugal. Lerdoy rossiik fuxe sana tid levgan widik ise va dataf taway ke oluikem ika malgesturama midud.

Tawayap koe Preussa is Ostera voxis mediterraneafa coyunta dum Espana is Italia dere tid. Voxen tunuyayan tawadayik wan tid levetiraf gu boza. Koe lenttaltefa Europa, aneyatson va kobara ko widava, jontik tawadayik va wida al jovled. Ant tanoy englik fuxe tola, toloy germanik fuxe bara, baroy francik fuxe balema moe taway al zavzagid. Lotan tid pilkotamik ise va rotisa kotcoba wan midud voxe va axaf warolaks malseotad kiren erba ta lusterava va kosudexa ik warzaf foalk zo gracir.

Aelakolama dun pitcar numen va « atoeem ko tanoya kita me plekud ». Ison tode zaipa dikote tid, pune werne blir !! Goxe werna bak 1847 uduton zo gracir. Akoler nume metcon zaxar ! Celemoy eireik aelakoled. Kore moraf tawadayik gan sid ok lidawicka loleon zo impavantad, pune dun tid wawaf : koe Breiza dum Preussa, va intockeem tiskid oke dace lebanugon lanid. Tel rotestus va ciastoa ba taneaviel is roloplekus va umta gu rostela ke safta leote tid. Gubefe rudecke tid mazdafa rostelaabre is dem dibuk kum ebeltafa ok lukoptafa regelta.

Bexe walpomara koe tawadayafa anameda krulder : tawadayik ta digira va milkava va sint katanad. Va aelesaf gertik taves pu rumeikeem gu ziliks sinkad. Fentugalon aname fliotafa keldega belcon ayated lize savsik va geja ke jotugal divrozad. Dace koe Rossia, yasa koe idul ke intabendingap iste renga va int saipon katrasir.






Bata yikya irubasa koe wida poke Napoli koe Italia va sanegaf sutesik doder. Inye va twa ke aguntanikye belir aze va dulzeks fu sutelar. Arbe bema, jontik italiik me grubelid.




Koe breizaf vesk, blira gitir sutafa : sinka tir kum ebeltaf beg burmeyer koe kwafe cade, is umtakirafe aabre. Ulida tir vaidaja. Tawadayik va intockem tiskir. Bonoleem koe dofa bonta senyer. Toloy rumeik fuxe sana abdi tolda mialukon mulufted.




Bati ziasiki yoltkirafi gu « Brabant » dum kulafa dentafa azeka ke Belga, tir dem toloyi ludzesiki isu loyta novesa va tantomon suxara va toloya bourga. Toloyi gimasiki va tawa vakrilon kabalied.

Moe flicueem, bat namulolsusik ke Landes gola vamoe milkava batkane tigr nune va ina rotanamdisuker. Bato vaykaxo banugale wan tir aaliskafe divatcepe. Pailtegaxo koe labaxo arti sanda fu kotaplekur.

Rossiaf tawadayik wan tid yegan levetirik. Zanisik ke jomaik ba beta derka gilested. Mujik widik krulas va yega, va ustagakera eked, kalwinon gan yasa is widikeem.





Jiomaik ke taway

Sinaf yolt tir « *landlord* » koe Engla ok « *junker* » koe Preussa ok « *boyar* » koe Rossia. Kotlize sin va siday voxis dile ayik digid. Ant va taway impavantad kiren in loote dam droka zilidur neken in va tawadayikafa kobara kodineper voxe pu telyon midus zilinsir.

Felisik va dataf ind digid : vas kunoy decemiray oku dace dile vuntoy. Banlize me irubad neke va ziliduks kazawackad.


Ziliduks tid akenaf tuke divburera. Molt ke Odesa va denta ke Ukraina van Europa kototar, isen mal Sankt Peterburg inta ke taiga aala zo divburer. Vobapale ke Espana is punta ke Napoli va London ok Amsterdam kan kotrafa tota artnid. Jiomaik koe tapegafo koda ke Napoli ik Wien ik Sevilla rofuglad kiren artan mu sin kobackad.

Tire koe talteka, dalaf pilkotik va tuwitara va midura trumad enide va kobasikeem di megad ise va lokiewafa warzenda bas tawa di seotad. Koe Engla is Danmarka is Normanda, jaftolafa zaava isu namulolafa isu okolafa zo tukiewad, isen laumase aultove dem kulafa atela van widava zo divtunsed. Malsavera va sazafa ok tuwavafa kosudexa va opafa adala pu europafa tawamidura ziluker. Pilkotik va tawamiduropafa aneyaropa koe moekote Germana is Engla bristud, lize sutafu tawaxo kankum kalka zo tukiewad, lize sid kum getuzakirafa ok radelulkirafa kosudexa zo tukiewad. Amerikafa is britanafa patecta va foalk divbured ; McCormick nomyelik va ganduks ko Europa doler : dolistesiko is vebaltasiko. Basfayasiko koe Skota zo ganduyur ise va gatcera va denta vas 160 deceminoc kan tevoy ayik nover. Kon tawadayik prostewon ralakus va baroy deceminoc anton robasfayar !


Felisik va indap, va cuisafe lamone digid lize va tcabanesa etsa is auzarapa grustad. Koe Paris ok London va gaderopafa blira mofelid nume mu mwa kuvafa gu intyon dulap volmiv brudad. Batkane va intafa impavanta laumasid ise va lo urmaf foalk rolusted : grustason va elice icde balkafo vebaltasiko, dace Napoléon III gindik tular !



Englaf pilkotik va lokiewaf okol ke tamava digid. Va bresitol moe glupafo indxo djukatcabaned. Tcepson onkad ise kan xali vebandad vieli vimtanon gan vultera, govitol di titker.




Englafa tota, aneyatason va inta adrafa gu geroteem giskis va kawodafa lupaxa is kelotaf rumneem, ko Rossia lapid. Idulugalon, drim va rossiaf bost kal molt ke Balta bira katitnid.



Targuca ke ganta tir gijapafa maneke jontiktan folid da ina va ayikafa kobara co rotikakobar. Vamoeon to divulaf foalk tir : « *locomobile* » lizimeltasiko. Kan esaf frez dem leltom is ruza, rojupar da gamiafo azakafo ziasiko miy abduinir. Bat foalk tiyir yarlaf is ronubokensen num kiewatcansaf. Neken gantafo basfayasiko va dent zo vegeduyud aze koe indxopo lolomanton zo favlayad. Koe Franca abduxoa tid zolonapafa maneke warzera va denta bad tolsanda zo jontolar.

Koe azekapa ke Belga is valente Franca, midura va botareza gu tela va zaipa zo gesiar. Botiaxe va bota lizukon solpad lize tawamidus dodelik radimi warolara kobad.

Europik mo krimtafa ewala ke Perua lapid ise va tunji tredud, i va tubodapasa kosudexa kum zverifa divluja ton bada. 100 000 levetirik kostayan mal Sinia vas 250 000 decitor tandeon warolad.



Lanison ok lakison ok kan kelot

Franca ke 1850 vas vawaf gort jonsanaf loon dam kelotxa ruldar. Numen riniz va sarenye diwan siver. Koe varafa Europa, lakira tir zolonafa laniba.

Aldo ke gamiaf lakirirem tir vas lo peroy decitor. Zuvda dem tuksa moe kepaita dile tir ontinafa vas tanoy vegem. Lakis butc koe Franca is Germana tir ekamaf lize vawa tid delafa. Voxen koe Polska is Rossia sleda loote tid diblackafa.

Voxe kalie ke riniz tir viafe : 8 km-/b- moo Paris-Lyon sarva is cugon 10 km-/b- ke piuteirem. Yoridik koe ledungxe tutufawed : koyara taneon tir to trasira va vedgobexo is voltaxe.

Englik tid soriik nume va dulap ke kelot vere vangruped. Bak 1850, va kelotxa (11000 km-) loote dam varafa Europa ixam al vedgedud. Voldum francik, va walta me kivad !

Parisik krupted da refe kalie vas 60 km-/b- ke kelotafa kametca tir bakestaca.


Bak 1850, impadimak ke Calais-Paris sarva saven gan *Compagnie du Nord* sistu, va wegoneem wackar, vas mialukon 64 km-/b-. Moo lan perdtum ke kelotxa, kalie vas 100 km-/b- dace zo abdufiyir. To belikafa wegona !

Nekev maya, francik dum ar europik kan impadimak toz gikoyad : bad 1850-e ilanacek, keloteem va 18 celemoy koyasik rembureyer. Bata ota tir cuge kiren dika sarva krulded : rontifa koyara to moo sarva wal Paris is Calais oku Rouen oku Orléans anton tir rotisa.

Vaxe englik is belgik, arak ke europikeem tir milekaf dam francik. Germanik va Berlin-Hamburg sarva azu Köln-Hamburg walo Ruhr azeka lirkkirapon al ravalidad. Rossiik va 470 km- ke Sankt Peterburg-Moskva sarva oyakanon anton al vedgedud. Mediterraneafa Europa va abici kelotxaki anton dadir.

Voxen foalk zo koaskir : ganta merot-acaginon abdufir maneke koe London dace riniz kan ganta guyunded !






Egale moe Dresden-Leipzig sarva. Tuidulasiko ke lizimeltasiko su edaver ! Kelotafa walta va sanelia mayesid. Neke va kosik leote dam riniz nekid voxo cugeke woed !




Rundanyatason va impadimak, koyasik ke taneaf kelot va lutafi ok wulafi lipi lusted. Francik va eluxafi lipi fure dadid. Britanik va taneafa koyasa liwa fu rubiad.



Xakola vas 2.40 m- ! Lizis krafol ke Crampton lizimeltasiko, ganduyun gan milyoltaf englaf dritik, batvieli tir an gijaf. Bat krafoltum kotunun tanamus moe witoka, va artfira va kaliepe nover. Kalie is musuca ! Crampton lizimeltasiko malsaveno moe lentef gort va gamiafa kametca rotimpokar. Soe vion mallapir : poopik is stasik va nendasa ilpega me dadid. Voxen foalk va ckanefa dugapa dir maneke europaf kelotaf sistueem va tulok lusted.

Koe Europa koyasik jontikviele eglud kiren vawa men zo murobad meie zo sugdavad. Bat iremstasik va mek vawaliwot dadir nume erutuson va kelda pu tawadayik govukir. Adre sugdavas gerot di zo inked.

Taneafe kelotafe omaze va tazuk ke riniz vided. Dile yult mo azekafe omaze opelon zo ticapter aze mo intafa sorka di zo dimplekur : taneafa dokobara wal kelot is vawa !



Gantatota blid !!

Tanoya gantatota fuxe sanoya wilttota : to pona ke toteem remlapis va Atlantika welfa moni 1850 mon tir. Balemnoriskafa *clipper* tota vegeduyuna koe Amerika va stamitaleem vas 4000 m² keve suka kaldeed. Tid kaliafa is abrotcafa is tigafa ise va anton santolka wal New York is Liverpool olegad, dem yultxo kotrafo gu kilta.

Soe neken, gantatotara dun abdufir. Taneon moe bost : tota rabandeyena gu setcakrafol nobon lidam impadimak lapid. Va Rhein bost iku Seine iku Loire dun katitlapid aze katiclapid.

Moe bira, golde krafoleem riransaf moe welfa leon dam aulafa lava ke kon bost, gantatota va lyumara va italtotapa flecud. Ta remlapira va Atlantika welfa, santevka tir adrafa. Voxen fure, galovaf ganduks grup-abduplatis va gamiafa yantafa tota : tropa. Cunard Line sistu koe Britana va belafa sanalubkeafa zaniga van Amerika banvielu grustar. Moltap ke europafa tadava dum Le Havre is Hamburg fure milaskid.

Kalie ke lokaliafa gantatota tir vas sanbaroye birade fuxe bartiv isen inafa raweyara tir vas decem-alub-sanoy decitor fuxe viel ! Koeon, yeldvajasik is yultxoik me stilad. Ravaldatason va kobligara, sistu va yeldaf emaksap kene birafa vawa koinked.

Bata vawa kotviele tid mila : tela lonobana tir tela ke lentefa Atlantika ise va yon decitoy lamasik mo warzafa tadava malgimar. Voxen vawa van Kaapstad stasa kal Barata ik Sinia ik Ausralia dere tir. Britanik va ina kalfelid nume kobureson va yelada ke Srilanka is vibonga ke Sinia is moava ke Australia tukulawed. Va lentefa Atlantika tuke *Great Eastern* tota dere djukufelid, i tuke ana tota ke decemda (211 m-) kabudayana bak 1859. Neken bata granafa tota ton koyasikafa tota me zo rosaveyer. Numen ta aykara va midaf laday malsaveyer, i va satcon taneaf laday kagluayayas va Europa gu Tanarasokeem ke Amerika.






Koe Franca, keloteem men tir kotraf gort. Kolapison va Nantes mal Paris, va impadimak koe Angers gobulut aze gantatota gorundanyat Kan setca-krafoleem, inafe kalie tir vas mon 12 km-/b-. Mal Le Havre kal Marseille, kan impadimak kal Paris taneon lapit, az kan tota kal Troyes, az gire kan impadimak kal Saône kuksa, az moo Rhône bost kan gantatota kal Beaucaire lize va impadimak kal Marseille rundanyat ! Varaf jįjacek ke koyara : 50 bartiv ! Gesiara va kelot gu bost kotlize koe Europa krulder.



Koak ke walatlantikafa tota ixam tir rotuvapaf, tire mu kulik. Bata jotafa englikya do gaasikya koe ilpega ke *Great Eastern* koyasikafa totapa senyer. Arti lerdka koe New York di tigr.



Bralkatson va laumas butc van Amerika, ugol ke cug molt ke Europa mea staped. Tegira ke tel ke London bad barsanda al zo jonbarar ; warzaf mugot dem gantafo madasiko is yoltkiraf gu Victoria zo vegedur.

Gantatota koe bira tid siakrafa loon dam clipper tota. Kaiki bopelawera ke tanbata, jivotgabeyena gan trazevda, stubesiki kaliapon belcatasi va koyasikeem mo azeba tod iyela zo gandud.

Anton 25 celemoy irubasik koe Lentefa Amerika kapbure 266 celemoy koe Europa. Darka ke Warzafa Tamava va dat aeles dodelik ke Manchester is stilasik ke Eirea ok Germana vanimpad. 13 celemoy ke sin va welfa di remlapid.





Flintik ke kawoda

Kotlize Rabafa Europa va warzaf leve-tirik digir : i va ludevkawodik. Gropeem ke kobara to melize tir olgapaf loon dam koe kawoda. Ika sutafa kuba, ayikye is ayikya is rumeik va galera is bli ludevon ice lupaxa arpumad.

Tamava va « tawayeld » vanpiyis « beg ke raba » mea rofiander. Britana va granafa tokoda divokser : vas 45 celemoy decitor, trabe acku ke tamavafa warzera. Kawaxo ke Ruhr is Belga is lentexo ke Franca ixam tid tegiso vox medrikafo gu vansara nume leote dam britanafo kawaxo warzed. Valente Franca, trasitison va yeld, vruni dile tid titsuyafi vas 1000 metre koe sidom.

Artnitison va mane aludeve, kawodik va tsema morumkana arte wazdel rundanyar. Okolafa embela va bato yambudapafo madasiko mallizir Koe lanyona kawoda, dace okol ko tsema zo ezbad enide va edava koe lupaxa di abduimpad. Voxen koe Britana droka ke batman impas okol tczarson zo uldiner, loon dam tela ke ayaf kobasikeem. Batdume ayikya dum bonol gu gamiafe omazeme zo vansorkad.

Kawodik va yeld skumason solimpad ise tid riwe lebaf nope belkesis idulap. Va elega moe ge kal omazeme djaved aze tito lird zo divbulud. Tiedave is kikawera tid nobafa numen yon decemoy dodelik koe kawoda flinton xonuked.

Beruca ke kawodikeem tir tulafa. Koe Engla to sin va taneafa grosiba tazukad, i va grosiba erusa va poura va kobara ke ayikya is rumeik is dinesa va sanbartivaf vielcek. Seotatason va mukot, remi jontik ilanacek di gokallyumad.!



Koe lird ke kawoda ke Ruhr gola, titsuyaf vas dile 500 m-, gantafu ku va kawot vajayan koe tsema ticbured. Yeld ta blotara va yantanyofasa rabapa adre vonena koe Rhein golapa zo vankolar.



Iyela va ludevkawodik dun pitcar : tieedave. Koe Blanzky poke Le Creusot koe Franca, lane edave va 82 xonukesik is 45 bakanik vere nekiyir. Viele giwasik malaskiyid, pune bam va fird anton lasutenutceyed.



Ayikya is dace rumeik koe ludev ke kawodafa lupaxa koe Engla kobad. Ontine ke lanyona tir vas anton 45 cm-. Aneyatason va yeld, kawodik goteriged. Rumeik klaaf vas santolda ok dace leon zo uned kire va lowwepafa parba roderemlanid. Ayikya vansomkayana kan lelafa anamba va edava impad. Gael zo gracir, belkesis idulap gazar. Kawodikafa awalkereka tir ontinafa neken tela rumeikafa dace loeke. Voxen vugtan dulapad.

Koe kawodapa ke Ruhr, gijaratifu gantafu ku noved da okol tit lird kan tsema zo titbured. Banlize va omazeme keno witoka ke lupaxa di impad ise bat kintaf bonol va afiz mea gire witid.

Bat putter impasik va yeld ke englafa kawoda va kobara al nonud : va kretura suteson triosud ise tod mekeldaskira gu yastera dratced : tid to taneaf grosibik.



Foalk ta askira va kotcoba

Va foalk empac !! To iegaks ke dodelik koe askedaxe tir. Tegibaf foalk kobureyen mal Engla va ayik gu stilasik artazukad ise va po is obliuca ke savsafa dodelik tumefavlad. Ctakik rodegltcas va olkotcapa ik grulicekas va gulaf riezot re tid vas mecoba : gradilik ke savsafe askedaxe jiadaweyed. Batdume va foalk dju-kalempad. Voxe va abduxoa me rotazavzad. Cadekapa tugulawed, krafolmaso meltukesiko va keskotuca ke jexe jonsanad. Koe Nasmyth koe Engla, granafa yezvasa myelga meariseson rosfonkasa va tirac zo romafelar : elimuca kan gijarotiuca. Numen gu tokcoba ayik wan zanudar ?

Koe Cail iaxe koe Grenelle lize lizimeltasiko vieleon zo ksear, dodelik kare rodaf nelkot ixam kobaved. Beluca lodam obliuca ik pintotuca ik po zo kodined. Koe Rhein gola koe Germana, Krupp va taneafi azakafi buli al iar.

Koe Engla, Bessemer va vartafo « arta-zukasiko » bralkar, i va foalk askis va kadara ke jenuk ton azaka. Koe Seraing koe Belga, blotatason va toloya gulafa cadeka, yelda vas 450 decitor vieleon zo anteyar. Mudor dem rabaf foalk banlize zo askedar.


Bat foalk va oksifa raba zo tolgenid, i va raba unesa va jontik dodelik. Golde ganta-foalk, Manchester al vanpir ano tamavafo warzexo va kiltaxa. Britana va amerikafa rilafa kilta jontolon dam arak ke Europa gatcer. Femura lidam layera zo tubalkad : warzera gan iaxe zo avplekuyur nume bad alubsanda zo jonalubayar.

Foalk askis va kotcoba zo gandud : asadas foalk iku vookes iku rubias va ros, ik foalk solgabes va witoka, ik kladasiko ik anamuckesiko ik gamedasiko ik kumlasiko ik meltukesiko. Dace trula enkon zo askedad. Kotlize foalkava xultur.






Keldaskitison va laumasa olegara ke yantanyofasa raba va zielt is witoka is kotsnigaf yaxay, koe glotcaxe, enkafo meltukesiko zo ksead. Bato tid granafa akinta mallizina gan krafolap kagluayan kan riezottum gu lavarotif lizis krafol. Va tuidulan azil divnis va cadeka, ton yone gedrafe pwerte raxivad. Dodelik va meltukeyena olkotca kan lica nared. Bato « krafolmaso meltukesiko » va toloy play dikir, voxen sin loote rotid. Koe lanyone glotcaxe, lizis krafol kan ganta zo mallizir.




Koe oksiaxe, warzaf foalk jupad da dodelikya va dure lokaliaf kobas armor gomalaskid. Gelusik va forma eninted : va codara is zersara xoled.



Yantanyofaxe ke Ruhr va olkotceem adraf gu raba iad. Jewes azil divnis va cadeka kan rekledapa ko egayani cupasiki moe sid zo aynar.

San-balemoy kobas bartiv fuxe viel ! To bali ke ayikya is rumeik koe englafe femuxe. Rumeik valem rujda goteriged enide va joaweyes fem di kavaniksantud. Gan gelusik zo balied isen vugtan va sin dulapad.

Cava mu kiltaxa plataer da rabik enkon askedad. Va rujda dem rubiasa akinta mallizina gan gantafoalk inked. Bata kobasa nuva va raweyas selt ixam obad.



Dodelikeem ke gasta

« Blira sedme dodelik tir to remblira », ~ Guépin kurmik kogrupayas va dodelikeem ke Nantes suter. Copafa gasta va rabafa widava tire al laumasid lize kobasik ke kawoda is iaxepe flavawed, i kobasik sure buluyus va tawaday az denfiyis va warzafa rabafa ervolia.

Kobas gropeem va kot kogrupasik pedrayad : yantanyofase askedaxe tid idularsafe voxen oksiiaxe tid fentunafe bak fentugal ; afi is darka kotlize tid dika. Dene razafa raba, meka rojuxa kev tie ik jivas warzeks krulder. Koe oksiiaxe ke Croix-Rousse revava ke Lyon, dodelikya kan leltom zo levrumkad enide va nugeem is nubeem ben foalk miledje di rozanieyed. Kle bad san-balemoy bartiv vieleon kobad ! Blis gropeem luxeon tir dace lorotaf : koe vard ke gasta ok dace dile furutsa, yasa va copafa vreda tcazon doded.

Koe Mulhouse, oksiias dodelik moe bapla gisenyed. Koe Liverpool is Whitechapel revava koe London voxis monaja ke Lille ok Lyon, dodelik sotre tola ok bara moe abdafa baplada kenibed ise bak idulugal me rotuidulad. Kotcakola alkejar. Tanoy rumeik fuxe bar- koe vard ke Lille joton mulufter. Blireka ke dodelik tir lefa vas barsanda. Tipu sometir. Pona ke estura luxeon sye tir kum beg is aabre is rostela vox vuga atela mei sum. Altelopaf sok ke dodelik koe patecta dum Franca tir rotapaf maneke sin va ervolia me rodedenfid.

Mwa va kobasik somenendar. In me rono-yaster isen grosiba zo biud. Tod akolera ok stilara, in koe nuda tere govowipiter. Koe Britana, tol-celemoy koe « wawaxe » zo greled lize dum tozekik zo kobuded.






Me nendara va unera mu dodelik. Viele kona deona sokir, pune in gowipiter. Koe widavama dum Nogent-le-Rotrou, tanoy irubasik fuxe per- estuson goburiefadar.



Koe Paris bak 1848 : vedeyefo kobavexo va loon 100 000 uneiskaf dodelik greled. Sye stilasik va intafa exava goksufed voxo arbe erba fure zo taruled.



Koe Lille, sutafa dilkiskafa mawa ika tandeon 80 franc talolk zo lizu-kedur, neken kubanya ke dodelik tir vas 450 franc. Konaka exoma va mila olkoba dile walzilid. Va ilava is dualt is moek me digid.



Zazda ke dodelikafa revava dun zo nobapad. Ayikya is dace dile rumeik dum ayikye banlize gilulid. Vor tir tcazaf, batdume olklavajeb ok ekotaj lodamon zo raweyar.

Gasta ke Berlin tid sutafa loon dam tela ke London ok Lille. Dodelikafa mona tid abdafa is tuidulansana. Dodelik nope alokafu sfianu is ruyatakola mejed Muvafa lidawicka va kotcakola tuzetar numen rumeik yontikote mulufted. Koe Preussa dum taltefa Europa, dodelik va sutuca ziadgegad nume gan artowas rieteem zo benfid. Kottaneavielon va sint katanad ise va acagis seltom zuken gan mwa tadled. Vageeemany ke tildes viel va sutuca loviele palser.





Yambudik is mawaf kobasik

Bak 1850 koe palka ke Europa, yambudik loote dam dodelik tid, lize sinafa runda mali yona decemda tir zolonafa. Yambudik tir vrebaf tiskasik va vieleafa muka. Vage is vukuda is xeka is gubefa iaxa is guto : kotcoba nubedon zo epur. Koe Paris is Lyon lan ceptiasik koe mawa kobad isen azilkasik koe nuda.

Bat yambudik koe gasta vols idja ke widava me tigid. Sinafa onya va vawila blized. Vukudiasik is edjiasik is vagesiasik is iyekotiasik ton solimi dem tilik is loviele toloy detik kobad. Bat dodelik yaston ice tilik blid, ton gropeem plinaf loon dam yantanyofasik is kawodik. Wori dile yasted ike dace va birgotafa grosiba tazukad, i tulon iyekotiasik is rubiasik.

Jontik dodelik, i tulon lesoiasik ke Lyon, mu dodensesa jopa, koe mawa wan kobad. Tod deona, bat mawaf kobasik tusutawed. Remblitison, va xeka kle di godoled oke di bemiazilud.

Lana yambudafa dreema va yon indap ke raba gedid. Tulon kolnara gan avlemodaf dreemik widwidon lanis darpe pradja zo felir. Sin tid bewik ke « Compagnons du Tour de France » seltom vaon vedgobes is ebon tazukas voxis kopomas tod unearge. Dreemik gu riteem ke birgotaf seltom zo kotaver ise va grot gomalskur. Viel dreemik zo dostegar, pune kovogar da va birgeem ke eba vol razdar. Batkane grupera ke rentas feliik iku kijas oxiloxilon zo remzilir.



Bate delafe is godjaf tawadayikye koe trivaxe ke Neustadt koe Pfalz gola ke Germana fentugalon kobad. Va triva nyofad, sukepeson ko yaxay kali seotara va djumen tazuk.

Kotviele kobara zo gracir, pune ugal ke moraf yambudik tuolgawer. Estutuson, sin va eka is jontika digina xa gokobed. *Mont-de-piété* kizey ika dimerbara voxis dulapokap di dimzilir.



Ba kote tane ke alubeaksat koe London, keldegatronasik va irpafa teixa tazukad ise va vawila kan rivafa lexa taulesid. En tid maaktk ise va rempafa keldega ke savsafo bedablo ilanacekon dun tronad.



Kocopa tir cavafa. Koe Germana elimafa weza zo epud. Bate dastase espaniikye moe gamdot ke Madrid va kocopafa weza lizukedar nume va mefta ke tael pu lanisik razdar...

Mali tolsanda kuba dene exaveem ke leso dun zo tuomad. Bat layesik va rujda al gononur. Meote mbi jafar. Ant japa wan rowarzed. Adre yambudik zo deokad.



Onyik is krupakirik

Francaf ok britanaf ok swizaf glastedik tir jivotkiraf dem wezo moe pez is kevumuva koe nuba, kaatoen gan ozasik. Joseph Prudhomme is Jérôme Paturot mbi krupad. Koe widava irubad ise va 2000 *franc* talolk ilaneon kazawad, trabe fuxetolon leon dam glastik. Golde bogruca ke taleem, va belaf ziliduks zinulad. Va megaks ton sokafa krupa al boad. Sina va dulapok vas 2 ik 3 % zilidud. Erbolkerbolkon kaydeson, vanbedeson va moavaf erbolk ko « baynafa omexa », va jwama konoletemba gan nazbeikeem tadled ; meka koayka moe konoleks krulded. Glastedik va tanoy oc rion dikir. Tod ocye, jupar da ine ta flibikeba di vayar. Tod ocya, va ina ta kurera bueler ise vetcoyer da ina va glastikye di kurer.

Glastedik va « atoeem ko tanoya kita » me aykar. Va yon lipok luster aze va mawa is kraba pu dodelik ok widavaf unenik tcazapon lizukedar. Va abiccoba kwon olegar. Pufon estur ise gilulimir ise va tanoya zanisa kwikya anton dikir. Va dile wenyaxe vols zazda ginobar. Taneavielon do yasa gozar voxe va tapegafo koyutaxo pu kulik isker.

Ede me tir krupakirik, pune tir onyik. Dolexepe men al awid numen doltama tid zaskafa. Lokulaf onyik tid atelonyik ok okoldolesik. Tel lomoraf tid arsaydolesik is moekote zazdatilik : Paris vas 26000 ulidebaxo ruldar. Blotaf kazeem sozilidur. Koe onya, kurenikya va yulte gedir edje kurenikye do pappleketik va bexa viunsur. Wana erba vere zo kayder. Koe dolta ok onya, koe tulon Halles revava, glastedik vas sint kotote vektad : tid «proyik ke vedey »!





Kelot va konak gwilt dikir : koe Franca, baroy pulor krulded ; toloy koe Engla. Britanaf koyasik ke taneaf pulor va erodafa deba besanafa gu talgukay rokad. Artan koe brid dem starkot kum inta va int flavad. Megatason, glastedik va toloy pulor plekud. Icde Manchester-Liverpool sarva, va itaya vas baroy shilling talolk is acku anton doded, ika aluboy kan riniz. Acum kelot tir guntas. Ostik va ugalwara nover : i va loon toloy bartiv icde batmil zalor.



Koe Franca, titison vedeyaf susik, korik gotir kulaf. Glastikye kanise va luster va ugal, taneavielon kabdue yasa gilingoyud. Tid rojusik va inkeyena vura.



Amsterdam, bak kon kielcek ke taneaviel : krupasik moe wirda farud, diskison va erodaf nek metapegaf vageem. Va lexa ke puzig terektað ise va zomxa pu nazbeik firvid.

Taleem ke Europa tir bograf, don englaf crown talolk lidam dilgavaf reaf ke gazik ke Espana. Napoleon moavaf talolk ok dilgavaf talolkap vas 5 franc va aldo kum karafa yanta remi decemda videyed.

Italia va raba me dikir. Glastedik ke widava tid kazik ok yambudik. Tana lokarolana kaza koe Napoli tir tela va iewafa zoma epuna az moplekuna leve disukera ke anelikeem.



Tamava ke erba

« Ant Engla koe tamava tir kulafa gu loote kulik », ~ lano karedjo isti decemda ruyer. Tire Engla tir patecta dem kulik : sin tid loon tol-kunoy. San-anyustoy ke sin va tufa vas loon 25 celema digid, i tulon Rotchschild omeltik isu Baring. Stokera va kulaca tir akenafa : 1000 pilkotik va bareaca ke pilkoteem is acku ke widavaf bedabloeem noelton kolnayan digid. London vas tan-celemoy kodiaf kwik ruldar. Oluik va 200 000 okol tcabaneteson malsaved. Kulik loloon tukulawed ise djumonedid.

Loon van roneka ke Europa, numen loon kulikafa ota kastawer. Koe Franca bata tir vas anton mon alub-sanoy celemkirik. Italia vas abic celemkiraf kulik ruldar. Voxen boyar kulik ke Rossia ok pilkotapik ke Otera va ctakafa tufa is ristafa berma digid.

Koe Talteka, zolonaf jiomaik is kulaf glastik den « ontinaf selt » va sint tere kojeyed. Va kodia koe krinayafa revava is kone lamone is yon taway koe winka digid. Tid bewik ke rebanyaso boxo ise va jontikote erba arientuson ik bedablon boason wapad. Tulon, Dosne W-ye ikagadikye ke Thiers va varafa nuda koe Paris kolanyar, i va Notre-Dame-de-Lorette nuda. Glastik is oluik va sokafi flipi beded. Gu fira ke tamava taneon zo givad. Batkane va tufa muson rovefad.

Ontinaf selt va sirta is kapa is tcabaneretsa firvir. Idulugalon koe kolavarafa widava va int katrasir, aze fentugalon koe Paris, is muvugalon tcabaneteson. Ayikya va suterotaf ok gaderopaf bontay gedid ise va yamba is dile opa bristud. Va cava kabudad ise va nazbeikeem den englafa sposafa olda ok alkafa reila staksed. Ke konaka tapeginda, ontinaf selt va tela va gaarapa dikir.





Vamoeef selt ke kristevafa Europa balte gisodegar. Bata oluapikya ke Espana do nazbeikya va wawik auzur. Voxen inaf firviks gan zanisikya zo anamzilid. Copuca va torigiraf jiluun men koplekur.



Okolafa vultera koe Engla yatkud. Bal Derby boda koe Epsom, 200 000 korik va sint nokied enide va okol ke oluikem rowid. Voda ke morbekseem va zultafa itaya artfir : wasik va celemoy pound talolk koucomar !



Koe Scala wenyaxe ke Milano, ixam tise tane lolistafe wenyaxe ke Europa, kaleyna ke Donizetti isu Rossini isu Verdi zo zirsed. Dro ke vistuk tir tczapafu isen « prima donna » dankasikya en tir diersik, dace dene sane ginamustese va vartafa evluba.

Kulik tcabanek kan okol va rekodafa kapa ba Saint-Hubert (tcabanetikaf tilik) viel grustad. Ayikyke katecton gu akenafa estura va int katanad. Ba ban viel vartafe voltaxe tigise poka Palais-Royal berma koe Paris va sersik is eldik is kulaf omeltik vedgobed.



Eglura ke Engla arse tir ombura. Dagafa erba ta fixuomba ok tanamuomba zo arpumar. Jontik xakes ombusik tere ksed ; flint nope boza krulded lize keson va lokiewaf viel, lanyon tazdasik va bliraki tiskid.

Grand-Véfour voltaxe tir tane losavsafte voltaxe ke kelu. Gulaf wocol moe azega dayker. Va prostewafa kaikulira taneatir. Lokulaf strabik va mielcek dankagason is ulison va Champagne vor gibetiskid.



Yon celemoy widavik

Tanoy englik fuxe tol- koe widava irubar ; tanoy francik fuxe balem- ; anton tanoy rossiik fuxe san-... Mali vonera va raba is keloteem, widava valenttalte Europa tid kaik-fronana. Banliz aneyatason va tufa, korik va tawaday al jovled.

Laumara koe Engla nelkon tir zultafa : Liverpool bad alub-sanda va 400 000 irubasik mal 50 000 artfir ; peroya ara widava tid vas loon vunta. Moe tadava, koe Germana Essen is Düsseldorf jontolawed, isen Lyon koe Franca vas 50% vanlaumar. Sanelia ke konaku kelu zolonapon kolaumar : koe Paris mal 500 000 irubasik kal tan-celemoy ; koe London mal tan-celemoy kal 2400 000. Arlize, widava vanlaumamad : Madrid is Roma tid aulafa, dum widava ke Rossia isu istefa Europa. Koe ban guazaf vox rabamaf wid, widavafa blira vawale savsaf migexeem nyebawer. Dile ban rawaf migexeem gan bedom zo ikaplekud, dum tulon vartaf *Ring* bedom koe Wien koe Oстера.

Koe Engla guazaf kimeem zo divroidad : sanefa gasta vegegeduyun kum norka va London anamlicad ; rapor mu ticaptewesa idja ke wid zo baliker. Koe Paris, ontinafo vredaso bedablopo zo jonkad ; erbugara koe warzafa revava dum Butte-Montmartre riyomewer. Dodelik va azeka aname iaxe koe Batignolles revava oku Grenelle frofad.

Kotlize tipu tir egale, moekote koe guazafa revava men grivegeduyuna. Lyon is Grenoble nope diblaf nudeem zo grupeped. Ant kelu tid lumeyenu... koe listafa revava ! Tozekuca keni copuca vanlaumar. Afi tir riafi koe gastaf nudeem, isen mugoteem ke London va kunoy dubiesik bravar ; korik koe Hyde gerd mielon zo aytad. Wori widava tid itupafa, tervana gan kotec irem is « ebama », blizesina gan ralpoda is zazda is disukexaxe. Koe Paris ok London, kot wawik va fastafa disukexa ke vawila rovod-impavantar.





Spor ke widavapa kan tie guyunded. Kotsielon, kon dotaf unenik va vawileem koolanir : va madasikimi kan vizapa tegirar nume va koafise tie tunuyar. Bat bolk koe Paris mali 1838 krulder.



Lakirirem rembures va stolenik mal flint kal malyerotxe kan « colubak » ixam zo giyoltar. Keni vankedara ke wid, nendatason va sanelia dure laumasa, parisaf ardial dikote tir.



Widavapa va zanela kan rinizap ton belafa sarva ixam dikid. Koe Paris, to gamiaf rinizap impokan gan okolap tid. Koe London, rinizap tid dem azekos. Pridura vol zo tenekar, batdume stasik kan ustara is pobaxara va kelda girengabed. Dat irem va bedom moolakid, i rembures irem is glabafa sorka is lakirirem is malima impana gan papleketik. Lanisik gotid xeyaf is wiluf ta remlanira va vraday !

Warzaca : « twak » inkeyen poke gamdot ke London. Evla ke taneafe piutegre luseon tir ke 1840. Greyena twa rem gazaxo kan piuteirem zo staksed.

Lo lipok va elupkafa lava me dadid. Lavaburesik koo nuda pridud ise rozason va anelik vukid. Wawik va lava dace gododer : ta burmotara baliker.





Rude ke kulik is azekor ke wawik

Dodelik va toloy *franc* talolk vieleon war nume sinkatason va yasa, va abiccoba dadir. Dro ke beg vas toloye decitgrame tir vas acku ke tanoy *franc* talolk. Tum dem aluboy korik va beg bad tanoy viel bromkar, ulison va vor vas tanoy datoycek (acku ke tanoy inoc) dem jontika lava. Atela ? Inafo dro tir vas tanoy *franc* talolk ika tanoye decitgrame. Francik vas vaon 15 kg- mialukon tandeon raweyar, neke koe Europa to lokiewon estur. Lok ke sinka tir kum rostelaabre is merey. Umta tir antaf gradjokon rolusten sudator.

Korik umote rogestud tid abic. Bal ilanacekaj dum 1847, aelakola koe Germana is Engla is Eirea jontikote tukosar. 65 % ke parisikeem va fastafi « beglipi » balikeni pu vurenik al kazawad. Vomgestura koe widava tir lorotapafa dam koe tawaday. Nekev ckanefa abduxoa, Europa va ael is inafa copafa teixa wan levgar.

Korik pojas va puve ke azekor tid gogolkirik : 200 000 koe Paris, trabe tanoy irubasik fuxe alub-. Va 8000 kalia dile vieleon raweyad. Mali balem-sanda nope sevakola mejed nume va int goroped ! Va estu vas 4 *franc* talolk is san-toloya gestuxa dene Rocher de Cancale voltaxe pu int firvid. Va orek is vumbuk lusted ; koe voltaxe ke Halles revava gilorotad.

Azekor ke glastik gubeon tir loon opelaf. Toltomon vieleon gilestud : miazizestu is sielestu. Banu zanolenu moe azegapa kum sladua bal auzas viel tir loon akenafu. Ison glastedikeem is glastikeem va voltaxe viakuse aname golda is dolexopo al vanikatcud. Rude vas koto dro krulded. Mane voltaxe ke Paris dem konak vegem, va milyone rude ika amidafo dro kare duga ke sumek zanolers. Anelik va delafa uvoona godir ede va rotal sumek dimnariyin nek dositas va estu ika tanoy *franc* talolk djulogackar.



Beg wan tir omava ke sanefa gestura. Kotviele zo gracir, pune aelakoia koe moekote widava ernigur, i koe widava kesa va kobligara mal vemaf tawaday. Liziba tid tcazafa is dikafa koe istefa is ronefa Europa numen grelera viapon vezud.

Ison bal derokugal, warzepesik va zaipa belcetad enide lotcazon di doled : koe Berlin bak idulugal ke 1847, begonya me zo vaneksad. Tere aeles dodelik ruzaded ise elaked.



Dene « Boxo dem uvoonapa » keve Montorgueil wawila koe Paris, san-toloy « sielestusik » ba teve sielaf bartiv artlanid. Ba miazif direvielon di dimlanid radimida va zuvda dem voltaxa al koartokad.

Orek tir rias arsay ta tapegafe voltaxe. Wori koe molt ke Manche bira, albasik ba ranyesa katecta meyarlon roraweyad. Englik va orek storped.

Glacière tourka koe azeka tigisa vegetalte Paris bak fentugal oprar. Opra zo empar aze koe kijayan lird besaaf gu tawa zo vider, aze ko varafa widava di biler.



Sutuca ke akolik

Tuke **abduxoa ke selaropa, akolesik mea sye tiyir muluftetes**. Laennec va arektasiki al gander, i va arektase de re favene gan kot selaropik. Bretonneau va « *diphtheria* » akola al vayar, isen Louis va kotcakola. Selaxopik va raskada kev voza is codeina kev boba is « *chloroform* » uga komodasa va akolesik abdi tcobara doled. Lyumason va mulufta, selasik ke ropexe re tid leon ankutaf.

Neke wan tid merotaskis kev konakakolapa wan tsentesa va Europa : wedakola va yona mediterraneanafa patecta vibar ; riftakola va 20000 belgik bak 1847 aytar. Beyolakola va 100 000 francik is mon 600000 rossiik al muluftesir.

Tokcoba kev akola zo rotaskir kiren teri is kio is noge wan zo megruped ? Va kudel is bismutel is gantafa kolavara zo savsuted. Ristus okilik ke Paris va dorita kan lima volmiv tredur... Metan banviele gruper da riftakola gan rifta zo dear isen keftakola gan tovol. Claude Bernard va yorda ke wela su kosmar.

Seltafu ralaku dum kotcakola is ikrakola is ruyat-akola kabe mergil me zo grelanded. Wawik deciton mulufted voxisen yon kulik. Kotcakola tisa akola ke widava va irubasikeem ke abdaf is tuidulansan vard tazecker. Icde lo europik, tipu me krulder, sinka dikote tir, isen akola va copaf runt taneon artstir : koe 8-e meok ke Paris, awalkereka tir vas 15 %, voxee koe 19-e meok tis dodelikafa revava va 38 % artfir. Anton tanoy francik fuxe san- va tev-sanda kaikfir.

Dodelik va toloyu muktum dem lava is 1200 kaloria vieleon blidar. Kev konakakola, va trigayam dem abica furayada anton rovoluster. Ba beto welkkirafosko zertur. Liketeson va vanrustara ke akolik, ropexe me zo kopaasleyed, numen bantan jontikote mulufted. Tipu is tuidulara is blotany zavzad gogol ke kulaf runt.





Elupkafa lava koe widavapa ke Espana me tir : kulik va int toltomon tandeon kolavad ! Lana ja va kolavara koe oga egad : va gartonga lizukedad ise va lava kal kraba ticlekud.



Kerafa Gamda walvedeyaf grustaks men krulder. Lana bema ta ropera koe Germana bak 1836 zo redur. Florence Nightingale savsaf vayasik, va ropera va bakanik bak Krime geja grustatar.



Apkazusa widava koe Franca is Germana va kiewatcapa gruped. Tulon Baden-Baden koe Germana tir idulugalafu kakevdaxo ke europaf vamoef selt. Klita kulafa gu kawaf eip gan selaropik zo juiked.



Koe Skanda, gantafa kolavara (ekwe « sauna ») zo ksuber. Kolavara do yasa koe wico kum inta zo dilizer. Lava mo rapor tuidulapayan num diveksoyas va ganta zo mimar. Radimi kolavara, fentafa lotara.

Donafu tcatexo koe beta wida krulder, i tcatexo gubeon blotano gan lava ke kuksa. Tcateson va griteem ke mona, ayikya rielon lanid. Koe widavapa, tcatexo tir glestapa dem jumtapa. Tcatesikya va grita levion tcateyena koe gantafo tcatexo eskelad. Grita otukayana pu « tubatakasikya » dadisa va onya koe revava azon zo dear. Bantan vaon gutcar ise kofigar aze ko glastaf lipok di bilder.



Puve ke uti is koyutara

Uti is koyutarula va Europa olgalicud. Uti vas « vefara ik relandera » sugdalar isen koyutara vas « divunkera ik gozara ». Englaf selt, i tel lokulaf is lodabdufis ke tadava, va donafa vefara grustar ise va pilkafa koyara ksuber. Taneon vefara, kore europik ta kosmara va englik me al ked. Amidafa vefara kare griva is runt tid : opramujuti mu weltikya, is duguti mu oluikye, is pujeruti mu kolavasik koe lavada. Korikye moe Champ-de-Mars vultexo okolvulted, isen Arsouille O-ye en tise englaf jiomaik va francafi nubuti koe sanefa revava raver. Moe Champs-Élysées nyelik ke fixuuti tir tev-sandafe burmotasikye ke Marseille. Germanik va viltarutifo boxo luxeon dadid isen espanik va jaftoluti skeud.

Voxen englik va graba gandud, i va solifi uti. Inafa vartafa olda va vayasik giltis va batyoni warzafi « uti » tazukad : witkotuti is flamviputi tid teli losanefi. Va tari tixad lieke dam okolvultera koe Epsom. Zo vertotad ise gan cotcesik zo eninted. Malyeruk va gableks xoled.

Meftavuti belcon tisi uti is koyara va pirtik vanimpar. Laofa ticumara ixam zo ksubed. Isen stropaf swizik va gida koe ontinfa meftava ixam al vegedud. Tela ke Righi va « englaf koyutasik » vanimpar. Meftava zo vanticlanir oke kan okol ok dace marovak zo vanticlakir... Koyutasik ke 1850 nelkon tid pestakik. Englik va Manche bira kal Waterloo remlapid. Francik ko Golfe-Juan lapid millize Napoléon mal Elbe ewava va int divtotayar. Petrarca koe Vaucluse utca zo kaaneyar isen Dante koe Ravenna. Voxen ugal is erba tid adrafa. Lekulaf korik ko Dieppe lapid lize va bira mafelad. Alexandre Dumas va cava ke birakolavara kabudar, lebon kolavason koe Trouville kene krimta ke Normanda...





Englafa olda va oluafe ok glastafe nazbeikye emuded. Va soli ta utifa vefara ilaneon tazukad. Soli ke Harrow olda va telyoni ke Eton bal prostewafa witkotafa buda moo Thames kuksa liked. Malyeruk moe winugafa rijna kentalte bost va int inker. Bata rijna koe Chelsea deoron ice London zo ksear. Batmana cava va Franca dere al artfir : korik moe Seine bost koe Bougival ik Argenteuil ik Neuilly is moe Marne kuksa koe Nogent giwitkotud.



Koyasik dulapes va debak is izva, va vartafa nyapesa neva ke Baedeker germanaf piskusik lusted. Va kota rotisa cenka trasid, tulon astol koe Pyrénées rodega woratason zo rolizukedad.



Dene aboyikeem ke rossiaf gindik koe Tsarskoye Selo berma, weltikya ke rossiaf vamoef selt moe impadimot gan mujasikye zo platid. Bata vefara mielon dilized, koafinon gan tilerda. Kitcova va batyona kafa kolizira givandositar.

Deligny kolavaxo bak 1842 zo fenkuyur. Pujes tavesik va neza is azebezara is djobega taved. Ant ayikya va drimula nobad. Lavada ke Seine bost banugale ware tir karapafa.

Nubutifa doaliera gan englafa mwa zo biud nume gan ardial zo rujad. Ton fortetotafa vefara, dile kadad xonukesise teldoalie. Saneg va itayapa gu doaliesik morber ise ieson lular.



Decem-celemoy rumeik a bema

Staksera va rumeik den bema me tir goni tove nazbeikeem ; emudera me tir goni tove soka. Bak 1850 bemafa debala tir egalefa. Franca tisa towa-payasa patecta vas loon 3000 bemiskafa dota ruldar. Tan-celemoy jotaf francik, trabe tanoy rumeik fuxe bar-, va ekemafa tazukara me kazawar. Koe Engla debala ware tir lorotafa ; ota dem bemeem tir jontolon lopinafa. Dace, koe Rossia meka bema krulder.

Kiren rumeik tire kobad. Koe tawaday, va bonoltum gisud. Koe widava va erba remblitison gowad. Dace koe kawoda zo uned. Velikya is jotafe rumeikye koe flormafa bema ke Engla zo emuded lodame zo gaad. Gertikeem is yon alkaf kizey va vugafa tavera ravalidad. Rumeik umeke gogruped enide va biblia robelid ise va mista rotarektad. Bematavesik zo ilkaded kire zo uculed da va kevmadara pu rumeik taved.

Wori glastik va dro ke gaara gruped. Lokulaf glastik va yasegaf tavesik pu intyone nazbeikye doded. Ar glastik va sin wetce bemik koe reila is olda is englafa « *public school* » bema is germanaf « *gymnasium* » reila rundad. Kotlize ugda tir febafa, sinka tir mazdapafa. Koe Franca, kolanira mamon gu truga vezur.

Lokiewaf bemik va kotla ok vamoefa olda di denfid. Abicote tid : fuxe 70 000 francik toleodon taveyemb, anton 10000 va aluteikaf dob oku dritikaf oku tavesikaf oku selaropikaf seotad. Koe Paris loote zo tazukad. Winkafa kotla zo jovled. Oxford is Cambridge koe Engla, is abica germanafa kotla dum Heidelberg is Gottingen va grupeapafa tavera pu wifraf saneg fereon meimpavantas isu kulaf solpad. Wori ke bat saneg, yolt ke vayasik dile tir Renan ok Pasteur ok Marcelin Berthelot.





Vayasik ke vartafa kotla ke Heidelberg ton germanaf bask kan abalt va sint toldoalied. Tel me tenuous va vayarugal dem vobiga keve gexata meelimon zo krupted. Vayasik ke Rhein gola tid gugafamaf. Va germanafa tanuca aname Preussa djukutugeltrad. Va tavesik neyaf gu tanuca lacon emuded. Volson kotla dum tela ke Göttingen is tela ke Hanover sposafa gu kuluca ke katcalafe nevaxe kovewad kire tid plabafa gu Preussa.



Kabe bema, kot rumeik va pula me rovonobar. Koe Antilla tursia, koe indxopo, boniasik va turwixe mu nazbeik ke intaf dodelikeem grustad. Sin koe mosk dum birelik tilded.



Koe ceskafa kotla ke Bratislava, seotatason va volruptesuca ke intafa patecta felina gan osterik, vayasik gaderopud. Sayarik va vura dunud nume va vayasik soped aze kan aze ke abalt dendad.

Koe Engla, velikya megaana gan gadikeem ko adlutafe vedgobexa vergumveltafe gu « flomafa bema » zo aykad. Tavesikya zo sinkad ise zo vreadad nume faston kobad.

Oluik va nazbeikye den kotla ke Oxford isu Cambridge staksed lize sin va ellasava is latinava voxis moekote nubuti is nugaviputi is vingouti is «wifraceem » bardon raved. Va djumapayana gaara...



Nudafa vefara is tamava dem vefasiki

Moe twern ke widava, koe kusk ke diel, moe viga ke wida, rumeik tid, kotlize rumeik. Europa ke 1850 tir jotikafa. Sanelia bad alub-sanda su jontolawer.

Sin ton tum koo nuda dun vulted ise taneavielon koe gerd. Koe mona me djuzavzagid. Gadikeem va uma darka me dadid. Rumeik ton blay zo gaad, deolon is kare intafa eruca.

Va vefara luwid. Ant kulik va vefasiki digir : va zoracak is balkafa bragoda mu rumeikya ; va digaf sayakik is pastawes okol mu rumeikye... Voxen rumeik ke kulik soe me loeke susker.

Rumeik ke nuda spedud ise kan niskama ombud ise ton « *marelle* » is « *ardialik kev dubiesik* » is « *ton namulol* »... Va fastafa disukexa koe gerd impavantad : avlemodaf lexisik is zopousik is dultesik is nedisik va rupol.

Va abica erba ta embela dem okol kum inta wipited. Koe Engla ba kristnazbalaviel kabdue kulafa kodia dankagad nume va yal mbi ikakazawad. Tite aal ba kristnazbalaviel, abicote jotaf francik trasis va kramte koe intocka tid kalackaf. Loote va mecoba kazawad.

Koe tawaday rumeik va vefasiki miv epud : va azdagasiki kum inta, is weltoz kum tcakuda rokev-kabus va lava kal baroye metre, is abalt ok zelt, is irem ok edava. Va lavarn kum inta reme salt ke kuksa aykad ise va ixakafa bragoda mu velikya epud. Ison jontika adlutafa jora dere tid edje rumeafa vefara va rundapa dun kereled. Vultera koe eyelt ok kan astol satcon jontikviele zo grustad.

Kaxe ! ctempiktum kaliarson gwardewed : mali anyustda ok sanda, rumeik kobatason zo staksed. Tel nobas va bema abicote tid. Ugal ke vefara tenuwer.





Seraphin gijik bak XVIII-eafa decemda koe Paris, va wenyä dem siniafa izga al koplekuyur. Inaf nazbeikeem va « *disukexa ke rumeik ke Franca* » koe lupaxa ke Palais-Royal berma kabdue jotaf is seramaf is erinven saneg blizesir.



Koe gerd ke Roma, felbesa sorkama impana gan deaxolafa tola noved da rumeik ke kulafa yasa va lakison gozas gadikeem milaskid. Velikya ton glabuca is wifruca va sint tukevlad.



Askedara va vefasiki al zo adupur : pulvisa bragoda is dace lanisa bragoda mali 1823 zo grupiad. Lana itafenkud ise itabuded. Bragoda ke wawik anton tid kum lembieyen liway ok dace roxanayana eluxa.

Koe sanefa revava ke widavapa gerd me tid. Wori taneavielon, wawaf rumeik ko gerd givedad. Koe Paris, Tuileries gerd isu Champs-Élysées isu Tivoli va gozasi tari vanimpad. Vefatason, rumeik va ivamuk is noyelt is grablerawazdel ixam dadid. Va kramte ik olyubaxa ik awolbaxa pu avlemodaf dolekik lusted, voxise va « *coco* » ulida tisa grisiputesisa aotcaca kum ristixu is lava is vobeda rotulid.





Nyelik ke abduxoa

Mecoba sotatcer da abduxoa va ayik is tamava betar : batcoba tir minia ke kot redusik tis germanaf dum Hegel ok francaf dum Renan ok italiaf dum Verdi ok rossiaf dum Tolstoy. Tire abdufira ke altelopa (satcon tralopa) is razopa is bliopa va warzafa abduweltera ke raba is brube dakted. Vox ke ayik ?

Jontiktan va inafi bali unded : tokkane rotatcet da in di tir levetirik ke foalk is erba ? Saint-Simon koe Franca is Robert Owen koe Engla va warzera djugrstad ise va kobasik djunendad. Karl Marx germanik va intafa «*Doevafa exaksa* » bak 1848 ixam al sanegar : «*Kubelik ke patectem, va sint katanac !!*» Vonafa kaaneyara va lokiewafa blirinda gu eroyafa rilituca icde izva ke ayikeem. Europik kan elakera va grot ke savsavafa Ellasa oku Misra va xanta aneyad numaze va tcila tukotrad. Guazafa cugexa skeunon zo dimempad : tulon Viollet-le-Duc va wevala ke Paris. Sanegap va izvaf berpot moebidur, i va tulon «*Baroy lofrik* » ke Alexandre Dumas.

Sukera ke redusuca va cava is abdimalyek nokier. Redusik kaike pestakevafa klokara re tid. Va yamba levmadasa va tari kuranid : Wagner, buneson va «*Tacedafa tota* » is Verdi kan «*Ezladankasik* » va kaleyna artowarotad. Lingesik va volkaxaasa razafa is zakafa ageltuca jugemed. Daumier va afreem ke glastikeem tumeawalkolar ; Courbet va ankutafe vox faretcafe sane linger. «*La Marseillaise* » balumaks ke Rude is «*Nuyuca nyapesa va sane* » trutca ke Delacroix va prantikya geltrevon kaatoed, i va ayik takrelon viunsus va bali.

Yambik is suterotik is grupeik va birgafa ervolia ke abduxoa tadled. Zo fovuiddad : va giwara kan kobara is beruca is tanara pu ayikeem gotaved. Redusik mea tid klokesik mei relandesik.



Skultasik va berpota ta fela suted. Ba kota warzafa bildera keve yult zo doded. Batinde Balzac dure erbiskaf va yon lokiewaf berpota suter. Saneg va wana ke rupa luseon skeuson ker.



Saint-Simon sernik godevraf gu Saint-Simon trakopik ton doda koe Ménilmontant poke Paris koe Franca blid. Kot va int milbaskon vager ise dum tucpastik giburmotar ise va vreda tcatet.



London, 1851. Ta taneafa tamefa divaykara, glupafa berma kum jenuk is triva yoltayana gu Crystal Palace zo vegedur. Paxton vegeduropik skuyus va bat artowarotas grabom va Baltard koswayar, i va kolnasik va Gardxe ke Paris. Gulaf gard varon tir yantaf. Swalot dere tid kum jenuk. Rapor is umava is norka ta vegedura me zo uneyed. Crystal Palace va atoera va telyon logamiaf rabaf foalk is jontik yambaf grabom ke varafa tamava noveyer.

Britanaf rawopik va tamava aname Mediterranea bira exuled enide va British tcila gu grot di profad. Bata gulafa kudja ke Ninive vanbureyena kan tota, koe tcilaxe kan gamiaf foalktum zo tcapted.

Italiafa kaleyna tir kiewatcapafa koe Paris. Volatason va runta ke bira, nakilasik va jontik foalknubasik formason tegulas leve moekap meklabuson uner.



Toza ke sanef feleem

Vieleafa firvira va fela pu kot grubelis ayik : batcoba tir muka daktena ke konak zolonaf felus tilik, i ke Émile de Girardin koe Paris is Walter koe London. Battan kan *La Presse* fela is bantan kan *Times* va cugaf saneg bad vug ugal djukalfid.

Va keskotafo ervo dadid : i va taneaf tanameso rubiasiko is foalk ta eluxa is midaf laday ta tralafa sumesutera sopusa va kaliafa amuzera va warzot, is moekote kelot noves va kaliapafa bildera va vieleafa fela. Dace tawaday zo artnir.

Va pedrasa dusiva dadid : tuomara va dolerafo dro is moekote sumpa ke giveem. Tuke batcoba, fela vanpir dilk fenkun van tamava. Va kutcupsa ke lafaga is nega ke koyas felusik suyon faved.

Va belikafa abdukuca meklabuson ko intaf brizeem zilid. Grubelis ayik va givaracka re olegar. Bak 1846 Charles Dickens va vieleafa fela zabdur, i va *Daily News* pulvinsis va gaderopa vox jonkas va munesten teliz. Va saneg kalion sker.

Wori jontikara fela ta pulvira va gaderopa volson zo redud. Koe Franca is Italia is Germana, nuyotafa fela dum *Le National* va rictulokafe bowere lyumad. *Le Charivari* fela va gaderopik ikoron ozar nume zo malyerotad. Seltevafa fela den dodelikeem galbuwed.

Sanegap va deasera koe feleem dere aneyar : va skulta ke Eugène Sue ok Alexandre Dumas iper. Britanaf belisik tir grolaptaf gu loskafa « *dakterama* » lize diremstasik ok mawakwik zo rokseldur. Girardin va tufa tuke « *Fela dem favlafa grupera* » war. Fela re tid vieleaca ke irubasik ke taltefa Europa.






Fela koe taltefa Europa va zolonafa sanegara ixam artnid. Englafa vieleafa fela tid taneafa, i tulon *Times* fela belina koe varafa tamava. Voxen koe Köln lidam Paris, gradjokafa fela zo askedad. Emile de Girardin va kot otuk ke *La Presse* fela ika 15 centime talolk doler. Sumpatason va saneg, gadesik va fela. Sanegara kaliapon laumar. Sumpatason va saneg, gadesik va fela va skulta pu losposaf suterotik imaxud : i pu Hugo is Dumas is Sue is Balzac. Bette kosayikya ke Balzac koe *Le Constitutionnel* fela zo sanegar isen Gertikye ke wida koe *La Presse*.



1851 : aykara va taneaf midaf laday ta tralafa sumesutera wale Franca is Engla. Nover da felafa lafaga va feleem vere givad. Charles Havas normandiik va lafaga koe Paris inker.



Kota akinta ke foalk ke Marinoni italiik va *La Presse* fela formon gu 1500 tulok fuxe bartiv rubiar. Laumasa tokoda dem eluxa abicdroe batkane zo rubiar.

Dolesikya va fela va felak alavon ice vawila inked. Ardialik va iegas dolesik eninted kiren bantan va biuna ik malyerotana fela jontikviele amuzed.

Vonera va feleem vas lapibeem is piute rupteper. Batdume avlemodafo bazaxo koe piutefe omaze ta mubera va daalas tweem bak koyara zo inked.



Gozasik ke taneaviel

Englaf tawadayik nesezur ; francik tadur ; mujik rossiik ulir ise stuter : taneaviel tir joraviel mu kottan. Taneon mu irubasik ke widava : taneavielon glastik moe Champs-Élysées ikpa oke Ring bedom koe Wien oke Unter den Linden ikpa koe Berlin tid voxo me anton sin. Bedom ke Paris isu Barcelona va jontik « *lamasik* » ke widava emuded, i va sutik ke gabentaf is diblakiraf deor aneyas va abic klokas bartiv. Koe Moskva, gulafa kildera zo askid.

Deasera tid jontikafa is gedrapafa loon dam batugale : moe Champs-Élysées ikpa, Musart dolpaxe is rossiafa meftava Ke Matela ke Paris tid, i riva emudesa va 6000 nobasik lize Auriol norlaf nefadik zo rowir ; « *kustofe lamone* » lente riva va diolusa ik bidgesisa disukexa firvir. Dere tid wenyaxe is dolpaxe is tawavawiray tis wiray va Paris darpe ugal, is dotcxeme is sert is intokol is texutiuxe is neseytiuxe voxis denon sirtaxo. Kiblara ke britanik tir lefa : koe Vauxall matela koe London, puve tid arafe dam gozara : sielestura ik stutera ik relandera.

Saneg va meabdiwiks dere albar. Igeltafa winkik ko Paris ok London ta nobara va wenya ik kaleyna lapid, solve jontika riva isu yerviktum va widavama is wida wan exuled. Tawadayik va rustayafa disukexa dere albad : koe konaka gola stezaf sulem dum vartaf « *alubiniaf jaftoloc* » zo kabdunedid. Taneaf kustrol grupeyen koe Franca koe Jardin des Plantes sulemxo bak 1845 awalker. Moe kazaxo, « *lukastkirikya* » zo kipegar. Taneaviel kotlize tir jora ke gesta.





Tawawawiray bak 1850 tir sanef lion dam wintawiray ke XX-eafa decemda. Saneg dodor nume va tawava kaatoeyena keve dzeteem ke vimava ronyaser. To in tir tano lonobano sumpaxo.



Koe Belga vartafa « *lerdeaksatafa jora* » kotgrupesa va ilanuk ke volruptesuca tir katecta ke jorapa. Koe « *vlaanderaf firk* » stasik va okoleda va jala gonuzar ise va lotara lasutsonder.



Jotaf parisik koe Robinson taneavielon gistuted. Aalabrava inkeyena koe gulafa duela va gelbe mu renasik tazukad. Kotbata brava tir tece voltaxeme ticlanine kan bil.

Sirtaxo tid kiewatcapafo koe Paris. Telo lovartafo tir to Mabile. Lekeon Mabile tise tavesik va stutera va sirtaxo mu tavembikeem poke Champs-Élysées ikpa zabduyur. Nazbeik va bato tawadayafa sirtaxo tugijayad numen ino vanpir gulaf lurd koafin gan 3000 tiegumka. Vartafa blizesisikya dum Pomaré gazikya ok Céleste Mogador ok Rigolboche tid. « *French cancan* » stute bak taneatomon 1845 zo askiyir. Kitcova tir dem loon 50 lexusik. Dro ke vansara tir vas 5 franc talolk gododeno gan ayikye... vox vas anton tanoy gan ayikya !



Bowesikeem is bowenikeem

Gazik ke Preussa is gindik ke Rossia volkan puloda bowed. Franz-Josef warzaf gindik ke Ostera dere vaon me kuranir. Va tela nelkoton naleyna gan dareik al dimstakser. Friedrich-Wilhelm ke Preussa dum Otto von Bismarck dokobasik va « *pulodafa pulvidara* » ilkader.

Istefa is ronefa Europa va goraks ke bowesik gonaler numaze volflideson koskur. Eldik va jontikafa is djoskafa ristula altogid. Koe Rossia is Ostera, va pumbara ke yone bowene sane me terektad. Lanbane dile me tid rossiafe ok germanafe : polskik ok ceskik tulon. Voxe dum kotare goveded ise va koayka gododed ise va sayakik gotiskad.

Talteon, nuyaca va runda al wad. Kevura koe tulon Franca dile gan bowesikeem zo kevalieper voxe zo kevnaler ok zo ginder. Saneroti, trabe kaatoera va sane, al abdufir. Koe Franca is Engla amidon al towar : koe London puloda jontikedje krulder, dem toloya koka. Taneafa koka ke jiomaikem va axafa gaderopafa zolonuca dikir, voxen toleafa ke doteem tir kalizisa nume va bowere kan brudara dile vetrovgar viele gan inafa gadera me zo keldaskir. Voxen kottan ta libura va krinanikeem me ronoklapar : lowawaf englik zo divvarosad.

Koe Franca mali 1848, nelkot ke « tamef vek » zo doster aze me zo kobibeter. Kote gijepikye va klapara rokar. Voxen loon barsanda tiskitir abdida krinanikafa koka va roticki ta stujera va bowere dikitir.

Wori francik va libura re giklapad. Bal libura ke 1848, plekutuson va klap ko klapak, widik ton daavaf tum va kolaf widot kallaniyid. Larde loban me grubeliyid, pune va adlufat gertik ok lamonef jiomaik ok rion bemaf tavesik pirdadayad.

Swiza is Sveriga is Belga is Nederlanda va puloda dadid, voxen Espana is Italia (vaxeon koe lenteon Piemonte gazaxo) is Ellasa va pulodafa blira me gruped.





Aboyikeem ke Ostera va pintotapaf is stegepes kitsend veger. Aboyafa blira va wana dem dolantina fiptara tazukar lize kota zatca abdiston zo titicker. Franz-Josef gindik to koe Schönbrunn lamone va jorapa ke Sona bak idulugal fiptar. Decemdaf ilanuk ke Veem ke Maria-Theresa va pilkovafa sizunta kavager. Bagaliik ke Veem tid abic (leon 500). Ant sersik ok riwetcapaf zolonaf jiomaik guon zo porad.



Englaf jiomaik : gevas aotceks va prostewa gu wifruca ! Tis tavembik dene lokiewafa olda, is kulaf mali koblira, dene jiomaikafa koka debokar, i dene budena rega dile pirdasa va nafalik.

Osterik kereles va ki ke Italia, va gugafamik djutanas va guga ton tanoy volruptes vedey koflintad. Jontik gugafamik va tanoya sanda ok loon koe sokza tiskid ise va direfa gijuca ke patecta klokad.



Koe Rossia, krinanikeem me tir : gindik va intyon piskot (« ukaz ») belin koe wida kan staksakirik ke ervolia ok ardial razdar. Meka exura zo ginder.

Krinanikafa koka koe Paris mali 1814 krunder. To int va favera va klapak ta kaliapa patara va klap gorayar : klap tid ton azakafa akluva lingeyena gu batak mu « gue » ok falte mu « volgue ».



Grabas ujeem

Ayik bak 1850 gu alkafa lazava wan zo brazad. Rossiaf gindik diner da patectikeem tir diksuevaf. Va katalikevik koe Polska is islamevik koe olgalicuyuna Turkestana is moekote yudik kosaf gu ageltucafa estesa brinuga (« *pogrom* ») nyerar.

Katalikevik gan englik koe Eirea zo ristad, isen mekatalikevik koe Ostera gan Franz-Josef. Papik va ralom ke Roma gire fenkuyur, i va vankolayana revava lizu yudik me ronodivlanid. Yudik koe varafa istefa is ronefa Europa zo ristad.

Lo europik belon alkud, felinon ok felison. Korik menobas va uja ok dopewa abicote tid. Disukera ke katalikevikeem ke Franca is Engla is Germana va Pio IX warzaf papik titicker. Sin kretud da in tir geltraf okilik ke kristevikeem. Katalikevik va soka is bowere vols papik gitarupted. Trakud da ant bantan va tuwarzara va folixa lyumasa va mefolixera ok brunuca ke rabaf selt koe widava rokoswar.

Folixa dene « *Protestant* » alkikeem blipon dimblir. Koe Engla abdikalisik va mefolixera tegison lyumad. Va francaf is swizaf Calvin evikeem is Luther evikeem ke Germana is Skanda godjon turestad. Volson, nuyotevik dum Vinet swizik gu gindesuca is tula ke Tanarasokeem va int koneyad : kota alka koe soka milton zo godoster. Va webera ke ponkikeem vols fukorlara ke bowere anton blidar. Va meka adomta golevgar meie va sokaf dulap kozanir. Vinet dum jontikar nuyotevik kristevaf ok yudaf ta nuyuca ke jiluca is tela ke ujeem belcon kevalier.





Gindik wan tir an felisik va alka koe « tumtafa » Rossia. Diksuevaf atay tir kristevaf voxë mali konaka decemda va rictula ke papik ke Roma kalvewar. Gindik va bagaliikeem is gertikeem (« pop ») ke intafa uja koflir. Ban gertik gan wikikeem zo kiewagid ise safteon mbi firvid. Kotviele gindik payun bro kaatoesik ke Lorik moe tawava va cenera war, pune gertik va sane kabelcad ise va drom poron gu nafalik dankagad.



Runi decemda, yudik ke lenttaltefa Europa nuyon ronovalkud. Ko dopewa va sint pereavieleon katanad aze va alkafa zanoxa taneatina gan « rabbi » gertik tooked.

Ba taneaf viel ke ilanacek, papik moe soza ke Sanctus Petrus wevala koe Roma va « *Urbi et orbi* » (ta Roma widava is tamava) kumzilira ziluker. Pio IX papik va bata prostewa lotipir.



Uja ke Roma va disukexafa exaksara va lorbuca albar. Tulon ba krist-nazbalaviel, orpa dirgackar da papik moe fogelom ke Sanctus Petrus wevala va pintik daremielon kobliyis koe Roma gokumzilir.

Protestant alkik ke skandafa patecta opelon gibliked, vewason va kota fiptara. Koe wida fuxe yasa va sint katanad. Tan savsik va *Biblia* neva belir, ranyeson moe rova.



Ervolia va azaka kosmad

Raba va geja ixam al betar : azilafa tota is azakafi buli va totatum kum inta is okolikafa vajikera budad. Viltasa gijarotiuca tugranawer.


Francik is britanik va bagalaja levgayad viele va rossiik koe Krimea gejayad : listafa vajikera ke britanaf okolik gan iyekotafi nek savsafi buli ke trumindeem ke Sevastopol zo joayad. Tenuketeson va rossiafa rojura, jontik « zouave » lanis sayakik zo gowetayad.

Wori rossiafa ervolia vol tir tela lowitafa ervolia ke Europa : tukevlaweyes preussik isu osterik icde ervo is gejopa gulon al abdufid. Va ayik is okol is buli meklabuson koomazed nume kan kelot mo meldxo lokalion vanstad. Gejara va grustara is nuva loon dam gelkeon re maldiner.


Francik is britanik va int lokiewon re kopaasled : Franca va sayakafa oldanya dum Saint-Cyr is Polytechnique digir, isen va keskotuca ke kaburervolia dure tukiewana folickid. Britanik va sayakik ta boniaxoeem moekote olegad : ervolia koe Barata tir tana akoba ke sona. Francik va martig ke Taneaf Gindugal luxeon gusagad, dem nugervoliik ton falte is kere is moldeykirik dem imgom is okolervolia teskesa moe sayakaxo ke Satory.

Ilamuca ke Britana va gejaf toteem dalon re benaykar, i va toteem kalfelis va bireem ke tamava. Mali geja ke Krimea, ina va loloon jontikote tropakirafa gantatota dadir, i va tota azakedana gu pozla. Warzafi tridenafi buli kal soluma vas 4000 metre robulid, solve guazafi gasitafi iyekotafi buli vas 1000 metre me artnid. Batkane britanaf toteem va abduxootsa artfir nume wan tir tel lokiewaf ke tamava.





Ugda koe englafa gejatota tir olgapafa ! Britanaf wideyik gan mwa zo nendapar voxen britanaf birelik rotapon zo askiper. Redakik ke tota va kotcoba tove totikeem rokar : ba beta rola batinde ustara ok peyara ok busumara to tid ! Tarlesik zo vrayar aze koe eyelt ko bira zo mimayar. Dile konak aksat abdi divtotara zo tiskid : kobligara ko tota rontion zo sopur. Ta sinkara va drig, blis bonol dace zo kototad.



Krupp ixam tir lozolonaf vegeusik va buli koe tamava. Bat germanaf rabik bak 1847 va taneafi azakafi buli iar. Krupp va konake iaxe koe Ruhr gola inkeyer, i koe gola ruptesa vas Preussa az grupes va rabafa vankedarapa.



Koe Franca tolsandafe yikye tudralayane va otuk xuvayar : tod « otukaj » di zo koervoliar solve xuyavasikany dimdenlanir. Xuyavasikaj rokar da va ikarundasik rotikadoder.

Parisik va sayaxaxo ke Satory grupeeked. Tigiso poke Versailles, to tiuxo ke fayikafa olda ke Saint-Cyr zabduyuna gan Napoléon tir. Taneavielon glastik ke revavanya va sayaxik auzud. Ervolia wafon gilingoyar, karolapanon gan parisik mafelas va jebes tantazukot ke okolervoliik. Glastik me vukud da ervolia tod artowara tir zobesik va vura ! Dodelik va sayaxik leeke karolad, i va sayaxik viltayas bak 1830 az teveaksat ke 1848.



Artowasik tegid

Dum divroidas goaks, tey va kelueem ke Europa mali toleaksat ke 1848 tantanon firder : taneaf teyxo koe Paris ba 22-e ke toleaksat sokir. Vawila zo obledad, gazaroti zo balier. Tey va Italia azon firder, i va Torino az Firenze az Venezia az Roma. Bak bareaksat va Germana is istefa Europa artstir : ba 13-e madakevera koe Wien divroidar. Arti anyustka, dodelik ke Berlin ko vawila divlanid. Artowara va München is Frankfurt is Praha is Budapest artfir. Guazafo gindaxo skotced.

Madakevesik kotlize tid dodelik is dile tawadayik voxis vayasik is glastik. Va vura tisa ristara tabid. Va nuyuca is rokara va kobara erud. Djukublid ise dalon nuyon djoblid.

Taneon blira : skapafa deona is aelakola va yon celemoy kosik koe Europa al nekid. « Va kobara, va kuba ! » ~ madakevesik ke Paris is Berlin is Torino imaxud. Omelt va keloteem is molt is iaxe al fukorlad. Batdume va pomara va blira ke kobasikeem kanid !

Koe Wien lidam Berlin, tawadayik ta tunera va levetiruca lyumad. Germanik is osterik is italiik va gaderopafa blira djupaked. Va tadlemwa is krinana koka kuranid. Glastik va sersikafe bowere luxeon mea djuveged. Va englakorafa puloda dined, i va puloda klapasa va mweem is pol.

Va nuyafa blira : to fuxa ke jontike europafe sane kerelene gan divefa ervolia. Ceskik lidam italiik is magyarik is slavik va osterafa ristula tabid. Polskik mea djutid preussaf ok rossiaf vols polskaf.

Bat « *imwugal ke saneem* » abicedje jijar : rusagafa rujara, va vura koe Europa kotlize di dimsular. Gazik ke Preussa is gindik ke Ostera wan felickid. Papik ko Roma rovodimpir isen parisaf dodelik gan neyikeem ke vura jontikote zo rezgaled, i gan neyik fure zilis va roti pu nutikye ke Napoléon I. Voxen kotlize sane va volruptesuca al grivuted. Mecoba va sine banvielu riojatar.





Osterik va lentefa Italia jontikedje kereled voxer zo ilkaded. Aloyatason va sin, sane ke Milano kevon obledar, pomanon gan sayakik ke Carlo-Alberto gazik ke Piemonte.



Koe Stuttgart, lana puloda zo tazukayar. Va klapara va tadlemwa is tanuca ke germanaf patectem erur. Dum pulodeem ke Germana, va mecoba malseotar ise gan rujara zo tsenter.



Koe Wien ba 13-e ke bareaksat ke 1848, glastik is sane va belikafi gazaroti ke Habsburg djuvetrovgrad nume va obleda tazukad. Gindik va tadlemwa govodabdiplekur, solve Metternich dalaf eldik akladan koe irem ke tubatakasikya al gonotcer. Kona puloda va int katanar. Voxen Schwartzenberg jadiwik kan ervolia bak saneaksat va Wien kanarir aze va bata maga solelar. Ferdinand gindik movogayas va gusagara va tadlemwa goxomer. Gan Franz-Josef zo ikaplekur.

Koe Franca rujara tir olgapafa : bak teveaksat ke 1848, Cavaignac jadiwik va madakevera ke parisaf dodelikeem arber. 25 000 dodelik zo soped aze 11 000 ko Jazaira ok Guyana zo rezgaled. Artowas lizor ilon zo bastakar.

Koe lanyona soka ke Germana, tawadayik dum bak Mialukugal wan blid : jiomaik va graltcek is yega koaykad. Bak 1848 madakeved. Ervolia kevon zo rozer nekazen sin va nuyuca seotad.





Re, debanyer, va jinafa taka moe badeeem gir, santason va jinaf usuk is pudomason tolkalison : « Gomallanil, meviele batliz gin lanitil !! » Me roverinú ; viele mea rodestivawé, pune va ewa aneyapá, veveduson va blayak inde merontion pulví, kire beka me roverinú, kore pestalé loeke dace vol ronowinú. Ikuza va jin anteyar. Kotviele belaxa mo nuba ke Marthe luber, pune zinulá da ine di ier. Va int koridá kire va mempera al joá, trakuson da plekuson va kutceem kev tel inaf, ae al tí oviskaf, vulkuson da to ine al askir. « Gomallanil, meviele batliz gin lanitil !! » Jinafa riyomesa ikuza isu puidesa va sint aotcewed. Batinde yatkuca ke dapnarin idatcol lion dam ikse rotur. Ede pulví, pune va Marthe di lutsagá. Jinafa amlitara tubemuar ; ine va trobindara koeon wir. « Larde gemelt tir gaverses, ~ jupá da ine trakur, ~ tison memalyaf nek rotir afalaf, areldon albacká da in di mejer. » Koe bat tey, tcoté, yoyermitá. Gu jinafa puidera divfisa va sardugal, rumeafa pestaka va int lopekud. Tí tcokesik me djumallanis kiren disukexa me puver. Kalí : « Me mallanití. Va jin al nulel. Va rin mea djuwí. »

Kiren va gadikeem me djudimdenlaní, voxe dere va Marthe me djutolwití. Lodamon va ine denu ine co aloyá !

Voxen ine boregar : « Til rumeik. Ae me narul da djiá da vay di mallanil, to kire va rin rená. »

Bogeson, kalí da gildapá da va goni gickir isen kurenik koe geja tigr.

Ine takazekar : « Abdi rin, tiyí kalaf, va aguntanik forenayá. Ixeyé da in va jin doplekunsuyur. To rin pu jin al nedil da ae va in me renayá. Jinafi goni me tir teli rinon trakuni. Volto rotuxadara pu kurenik, vox to merotuxadara pu rin. Mallanil ise me folil da tí ikoraf !! Fure va jin al vulkutul. Voxen va volkaluca ke rinafa blira me djunekí. Boré kire tí guazarsaf mu rin ! »

Bata renewa tir lugodafa rumeaca. Isen damo beta jinafa darefa skeura, va mana rosontena kontega ke sanlerdikya boresa kir rulesa guazarsafa ste meviele gin wití.

Kiewotuca ke bata taneafa kutcara va jin al awuzar, bro ilt taneon yoyan. Volto koe warzuca vols gubeuca va puvepe sotrasit. Kadimion osk va art ke Marthe giltickí, voxosk mea rofiandé. Voxen ine pulvir da va jin kotvieli co rozelar.

Resielon, Marthe va jin kal mona dimstar. Tigitison loon pokeon, lev seila ayaté, ise va ine bene fonta gí. Mea kalir da va sint mea tolwitiv ; volson, tir gabentafe trakuson da va sint fure buluv. Vebar da va kunoya oviskaca ixú.

Kabdue gadaxe, vol djuprogiské va dimlanira ke Marthe ant, nume kal inafa oga dositá. Ape bata rumeaca me fu tenuwed kiren va jin gin djudositar. Nalé, ant ede arte zaloracku va jin fu isker.

Arti gavesu bartivacku tori sielestura artlaní. To taneafa toma tir. Va impadimak gu bata gavera koridá. Gadye nujifolir.

Mea koncoba va jin anzar. Koe vawila bagon re laní, lion dam koe klokara.

Va kotcoba jinon gojeyena remi rumeugal re gosugawalká. Ison jinafa muntuca va firviyini vefasiki blokayar. Mana targuca nope vefasiki miv va int zilisi co tir ! Tí grijaf gu ske. Va Marthe dikí ; volto jin va batcoba al kalí, to ine. Va inafa vola rotuzá, va iteem ik ma rokutká, va ine roblucté, robloká, inde djumé. Bak yokagera, bugdadá lize inafa alma tir lebafa enide inafa gadikya di uculer da ine va fertik dikir. Va jinaf tozeltayeem co djutcalá. Jinafa rumeafa govituca va guazafa sugdala ke ralfeks katrasir. Marthe kalir : « En, va jin bugdal, tcalal !! Co djumé da kottan di gruper... »

Va inaf moueem co djukutká. Me roveberú, trakuson da ine miv bundatar, bro kutceem. Arti abic viel, re gidikison va inaf kutceem, va konara sutkaca mea guzeká.

Afigon ice tey belcon gibeliv. Va twa vieleon stakseyena gan kurenik mal redjel konakviele komimar. Oye sinafa bemuaca, diepilé da twa ke Marthe leleon tukrenugawed ise loloon turiawed. Akolukemeson va batyona twa teyesa wí. Sina va tey remi gemelt tugijad, isen areldon kiva da loon afton co wí.

Marthe re jontikviele erur kase ae mali cinafa taneafa kakevera al rená, culimer da abdi intafa kurera me al kalí. Battode me co kureyer, ~ espur ; ~ kire ede va teca rena mu Jacques tozi aguntarugal al satoler, bat abrotcirsaf golde geja va rena ke inafa takra abicabicon al sular. Va Jacques ba kurera ixam mea renayar. Pokoler da bat sanalubkaf udorcek dozilin pu Jacques va inafa pestaka rotir di artazukar.

In vanyer medeksaf. Kontan renas va tel merenas sozuner. Neken Jacques loloon dun renar. Inafa twa tid ke mejesik, i ke wiiskik ontinarson rundas va dilintafe Marthe num merofolis va kona levcoera. Acum va ant int koridar, anton voseson da di mbi pebur inde va ine al rorotur : « Krupté da tí duskapaf kapbure rin, pestalé da kota jinafa ewa va rin bakar. » Marthe anton dulzer da in rokler, da va mecoba culimer.

Bam toza ke bareaksat tir. Imwugal tir abditcaf. Remi kot viel viele Marthe va jin ko Paris me dositar, pune lebafé kake ezbanda, ker vieli mal ravera va zovdara di dimlapí, senyese kabdue keldega lize krubinta ke ikagadikeem wan teyedar. Ine al erur da in va eksa toltadler. Me grupé da va teca vazuca lente koncoba meviele askiyina satolet nume zo kagí. Va Daphnis trakú. Batlize to Chloé va konaka tavera al kazawar numen Daphnis me roveberur da di mbi taver. Ae, kas me krupté da Marthe kre tir ketik zurteyen bak taneafu aksatacku ke kurerugal pu megrupenik az konakviele konariyin kan po ?

Kotsielon, antaf koe ilava, va Marthe dun rozá, va int sateson, jin fogetis ayikye, tí dikeke va ine gu fertya lajupaskí. Kotvielon, lanison den ine, abduplekú da me divlanití abdida al askití. Ba jinaf santevdaf ilanukviel, bak bareaksat ke 1918, beka ine voser da me di mibuegá, pune va ezbanda bundar, i va ezbanda milafa gu tela intafa, ise djumer da dene dalint diskítí. Daavon, riwe seredjú, jin someaskis. Jinaf yontagem ! Kiren cwe batvieli to kivara va kipeuca va jinafa jugemera al riojar, i to diskira va vage viele ine vol diskir. Taneon gorá da va bat gem ba resiel fu diskí. Azon tuckerawé, gildason da yal tir dem culimera.

Runi cinafa renara, Marthe va tselka ke kraba al zilir enide koe matela me goketé, ede xuye koe widava co tigitir. Va bata tselka levogunon rozanié. To pereaviel tir. Va Marthe bulú, abdiplekuson da ta miafizestura doon eldeon lanití. Voxe kuraní da va ine runi siel woratá.

Ba sielestura, pu gadikeem dakté da va gozarapa do René koe Sénart aalxo eldeon fu boká. Batenide ba alube bartiv sielon mallanití. Larde varafa mona wan kenibeter, pune metel va bartiv ke jinafa mallanira ik kasafa mekenibera di rodiepileter.

Va bat azed pu gadya biwe su divrozá numen ina va kita kotrafa gu eksa tori kelda miv djumegar. Zo yondá, bata kita va kote berpote is lugode ke jinafa tegira vilar. Jin abdigrivutes va mayera ke Marthe viele va mawa kolanití, va inyona mokipera re trakú viele ine va bat mempese sersye dem kita ta baera bene ma witir. Kore pu gadya kalí da René va int gu kotcoba al paasler, pune ina vol terektar. Loa acagira, to divmodara va uculera co tir.

To coba tuvolkalasa va kontan, va artan co tukalar. Edje gadya va kita tukotrar, i va kita blokatasa va taneaf renas mielcek, pune va gojepes iteem ke berikeem wí. Va deara va kita trakuckú, voxen moida sin koton al estutud, kore co zo ustata, ae puvegutuson va lanzara va jin, va kotcoba djupwadeted.

Gotrobindá larde cwe mek vask nutir enmusaf.

Levvogá da kaiki miamiel mallanití viele laneté da gadikeem al komodeter. Lasubelí. Voxen ba mamlara ke sane bartiv bene dotaxe gadikeem ixam koe ilava tigr numen mea roké. Koe taneaf vegem irubar, jin koe sidot. Enide va rebava loeke melorason fu urpé, pune va twindeem me kodiskí. Gison kan bata nuba is gison kan bana va bata kita rantafa oye tirac, va kwikaf tuvelam obrason fenkú. Muva dur. Kiewaxe ! Muva va lor fu besar. Kozwison da afi wan tir runkafi koe mawa ke gadikeem, riwe dimon djuprosenyá. Voxe mo kelda ixam laní. Ison xelkara va twindeem re tir volrotisa ; golde muvara gonokotiskí. Azon, va rebava gonurpé kire va polkubiota gometuwidlá. Va rebava vanlaní, liz tudrikatason va yatera, moi sielestura va matelarova kevon al rundá. Bata rebava tir dem mikiya moe verol. Muvara askir da sina tid kildesa. Viele rumkanyá, tana luber. Jinafa polera va lor ke akeoyera jonsanar. Ko vawila re gograblé. Va kita kan talgeem gí ; ko warula lubé. Bak tanoya wexapa wan ranyé, itamadason van dilk ke gadikeem, witison kase bettol co zekar kire va koncoba al sonker. Dilk wan tir vlardaf. Tí vawelaf !

Lanitison den Marthe, va Marne kuksa kenelaní. Terná da va kita ko kona amna fu palsé aze eldeon dimnarití. Geja va mani tegi tuwupesir. Ae tire, ant lize amna tigid isen lize va kita co ropalsé, pune sayakik va J- za anamsur. Jontikedje klabú, zwaf loon dam kontan daykas va fobaki. Nekon va jinafa volta lajumastú.

Polku ke Marthe tir budeyenu. Va marna sokiskena koe twak narí. Va matelama vultedason remlaní aze va rapsay ticlaní. Va twindeem tiolté aze va fogelom ticlaní.

Marthe gitir noglotapafe ! Witison va jin kolanis va mawa rotir fu krezer. Skotcé ; va trek ke ludot me trasí. Tere va marna vion tacé, divmodatason va metan. Koe sarandaxo va kevumuvak apté. Kivá da va mamlesiki gu vulesiki fu dojé. Va mawa uzeustason kallaní. Vukí, gire djumotceson. Rotir Marthe va jin someixeter. Oken ede vere co fu kosmá da va jin levcoer ise do ayikye tigr !

Fenkú. Prejá :

— Marthe ?

Dulzer :

— Lodame, va jin maneke vudesil, pune anton eldeon ba riel co rotartlanil. Va udor abdi anyustka kle seotal ?

Va jin gu Jacques dojer !

Neken, wison inde va in co emuder, milviele zo givá da va koncoba ixam palser. Jacques arti anyustka nuve artlanitir !

Runafí. Ine lente rebava wan senyer. Kalira co tir favlafa : « To jin », voxen wori, me kalí. Kev berga kutcá.

— Rinafa vola tir pumapayana. Va int bosolal !!

Bam rwoder aze malier.

Va tila vere betar, aze me lasugildason va jinafa mielafa tigira :

— Voxen abegye, fu akolel ! Va int kalion basvagal !!

Ampur ise va tey koe bontay dimblier. Viele ko mawa dimlanir voxen me zeká, pune kalir :

— Kas djumel da pomá ?

Jin loeke kivas va gemelt ke basvagera is guzekas va kipee ke batcoba, va muva kumzilí, i va muva getcasa va gadikyafa sugdala pu bata basvagera. Voxen Marthe ko burmotaxo dun lanir aze dimlanir, witison kase lava ke grog uliba tir idulafa. Tere, va jin lewe lebaf moe ilava is palsewemes lev krinca trasir. Buzegar : « Gulebara tir oviskaca ! » Va jin gu Köln plawa pragadar. Azon, Marthe va gemak fenkur aze va mielaboz pu jin kevmimar. « In cwe tir vas rinafo ontinalto ». Tan aboz ke Jacques ! Numen va rotickisa artlanira ke bat sayakik trakú, larde Marthe al folir.

Koe ilava tigí. Marthe kazokever. Erú da di artafir. Kiren, dace koe inaf meem, va jinafa vazuca rodaxá. Mielak va jin fu tutakrelar. Marthe zijnon dulzer :

— Me. Va rin komodes djuwí.

Oretlik koe alto, ke Raymond Radiguet (5^{-eafa} zixa ; diza titisa koe diref otuk)

Oretlik koe alto : berpot (1923) ke Raymond Radiguet francaf suterotik
Xanto : Le Diable au corps francavon, kalkotavayano gan Laurent Lermigny, 2017.
 Dotay : Kotavaxak dem Suterot.

Robelin banliz : <https://fr.scribd.com/document/358060704/Oretlik-koe-Alto-ke-Raymond-Radiguet>



ELMOL

Veem : *Soricomorpha*

Yasa : *Talpidae*

Lum : abrotce ke taka is alto vas 18 ik 25 cm-, is ault vas 17 ik 21,5 cm-

Talgeem : $3.1.4.3 / 3.1.4.3 = 44$ talga

Nazbarugal : Imwugal is idulugal

Ocagugal : 45 viel

Oceek : 3 ik 4 oc

Ikralukruca : 6 ik 12 aksat

Talpidae yasa tir dem san-toloyi oxi is san-lerdoya katca. Bat dunol sotid ordon suxas : va erilt dun suxad ise koe levisid va blira loedje tiskid. Ke *Talpidae* elmol, va lavedafa ok pakon lavedafa vox katecton levisidafa katca soe trasid. Jadion batman elmol va abrotcafo is akintafo alto dir ; pezay tir otsaf gu tec varzot is prantaf is pimakoraf is abrotcaf is imiskaf. Iteem tir pinapaf is fereon besanaf gu alma. Elmol va divefa oblaka somedir. Kota inia va aluboy gelt sodir isen loi oxi tenafa niska ke gelt va rowipine vasizefe belaxare ok toloya vidila did. Suxasa katca va abduiniapeem dem tanoy lopekufa niska (buprakorafa) sodid. Oxi vas angabol tid toloyi dem tanoya katca fuxe oxi.

Rossiaf angabol (*Desmana moschata*) vagetalte Europa is istaltte Asia tigr. Ault tir xuon azekackaf ise in va yon ducak ekwon ice ault dir, batdume va adalafa dakela ke lonta gidiv-daaker. Va ault is beweeem ton abduplatis mergil koe lava faver. Im tir dem listapaf myot dem trelaf is vaf is pibapaf levbiy ; almaga tir kum lodabrotcaf is lodolgaf im. Uka ke inafa bia tir kerabertre ik lukopte. Akangol tir levedaf dunol abdualbaf va domega ke voa lizo salt tir lepof. Runak ke tawaz koe mid sotigir, titsuyon umeke sulem rokopujer, bak dace fentugal ugate lava oprar. Idja ke tawaz vamoe lavek luexon tigr. Tawaz vugviele tir ke tum gubeon faven gan konak sulem.



◀ **Rossiaf angabol** (*Desmana moschata*) sotir logljafa katca ke elmoldunol (*Talpidae*).



▲ **Ronekaf elmol** (*Euroscaptor micrura*) iste Asia isu varone tigr. Ault tir trelapaf dem vug im. Bata katca sotir tela lopinafa ke katceem ke *Talpinae* volveyyasa.

▼ **Elmol ke Taiwana** (*Mogera insularis*) gan lanyon sulemopik gu bumafa katca zo torigir solve aryon wetce apta ke ronekaf elmol torigid.




▲ **Niponaf elmol** (*Urotrichus talpoides*) tir tegirapafa katca jontkviele divlanisa ko ruxeem, katecton grutcomasa ben aal ik amna.



▲ **Elmol dem bitejoraf pez** (*Condylura cristata*) poke lava soblir. Otsa ke pezay tir dem cotkiraf bentum.



▲ **Amerikaf elmol** (*Neurotrichus gibbsii*) tisa antafa katca ke bati oxi, tir gundapaf g niponaf elmol (*Urotrichus talpoides*). Kene krimta ke Lentefa Amerika is British Columbia iste California tigr, kale ontine vas 2500



◀ **Elmol (*Talpidae*)** loote sotid suxas sulem blis koe erilt lize dun tid tegis. Enwe me fentugalus. Lanyona katca ke bata yasa tid lavedafa ok pakon lavedafa, anton dile blisa moe siday.
1) Elmol dem bitejokoraf pez ;
2) Gubef elmol ;
3) Rossiaf angabol ;
4) Ronekaf elmol ;
5) Niponaf elmol ;
6) Wiiskaf elmol.

Wivga tid vrandega is lesko is broza is lonadunol is beza is ato ke kabay is salmey is toka is kabayam. Soe sin va ruxaf tor dere gimal-estud. Jijacek ke ocagugal tir vas mon balem-sanoy viel. Baroy ok balemoy oc koblid, tison mewis is talgiskaf is riwe imiskaf. Remi barsanoy viel di movvad. Lontakiraf akangol ko kuksaxopo ke europafa Rossia dile divlizer.

Katcolk ke *Talpinae* volveyyasa vas gubef europaf elmol (*Talpa europaea*) ruldad. Vuwaf ronekaf elmol (*Euroscaptor micrura*) tir abiceke lopinaf ; male Barata kale Mongola is Nipona is Taiwana tigr.

Scalopinae volveyyasa vas san-toloya katca ruldar : anyustoya tid dem grugildes oblakot. Ke sina, *Urotrichus talpoides* katca koe Nipona koe aala is meftaxo ontinon ice mon 2000 m- blir. Vas akangol vektar. *Neurotrichis gibbsii* elmol tir nuxapaf ise kene taltefa krimta ke Lentefa Amerika male British Columbia kale idja ke California, ontinon ice mon 2500 m-tigr.

Elmol dem bitejkoraf pez (*Condylura cristata*) koe Kanada is Tanarasokeem tigr. Tigixo tir koe abdaxo ik diblaxo. Alto tir abrotcafo vas 10 ik 13 cm- voxen ault vas 5.6 ik 8.4 cm-. Aldo ke milgik tir vas 40 ik 85 g-. Im tir vaf is acagisaf is gilavaf, solve uka ke bia tir lerkebeltafa ik ebeltackafa. Lodadalafa kira ke bat dunol tir pezay otsaf gu limega dem san-toloy cotkiraf bent (san-tanoy bene kot kril). Sin dum kinti zekad, satcon viele olkik va sinka kaaneyar. Ape tir dis va uzasafa vila. Wali acku ke balemeaksat is acku ke teveaksat, elmolya va tanoy occek dem toloy ik peroy oc tandeon nazbar. Divaxo ke erilt ko abdaxo sye tigr, vox dile rontion ko mid : bat sulem grutid donaf pujesik isu estobasik ; fentugalon valeve opra dace grupujed. Dalafa sinka moe ludev ke tourka is voa zo narir, ise tir kum broza is tul is lavabeza is dace kabayam.



◀ **Rossiaf angabol** tir pakon lavedafa katca : va kuksama dem saltam tigisa koe aala ik aalaf rijust abduialbar.

▼ Abduineem sotir kotcakoraf is pakon pivkoraf.



▲ Malesturinda ke rossiaf elmol tir kum lonadunol is kabayoc is vrandega is broza voxis kabay is ruxaf tor.



◀ **Elmol dem bitejkoraf pez** tir deksapaf pujesik, dace koe mid, kan balemoya inia. Inia vas tela ke *Talpinae* elmolaf katcolk is tela ke *Scalopinae* elmolaf katcolk vektar : mante ke abduinia sotir miltafe gu abrotce isen walgeltaf bewot sometr. Ault tir ekwon azekamaf is besanaf gu kralk is abic imolk. Bak fentugal is imwugal, xakola ke katcolk (ke dunolye lidam dunolya) laneke tugijawer. Batcoba ape tir neki ke vanbедера va sum tegis dum tec faf balikeks az faveten bak renugal. Elmol dem bitejkoraf pez somefentugalur nume nutir dure tegis. Va tawaz gibulur, dace edje noldacek kire moo welma ke nolda grulanir ike va eriltap gisuxar.

▼ Otsa ke pezay tir dem tol-san-toloyi teci cotkirafi kinti udewesi kotviele sulem estur.



▼ Sinka ke elmol (*Condylura cristata*) tir kum beza is lonadunol is tulwadunol ikz-.



TELIZ

2^e bu : Sareon gu taneaf kelot

48^e bu : Oretlik koe alto, berpot

54^e bu : Elmol

56^e bu : Kuda ke Aisopos

LIWOMBURA

Tula va liwa ke lana ombaliwa watson gu alto.
Konaka gokosmana peryasafa ombaliwa.

Xantaza :

<https://kotava1837481.wordpress.com/2018/08/26/7-familles-en-kotava/>

Kotavusa virda

Virda kotavon sanelayana, nuyon is faston
romalvajana is rorubiana is rotanamzilina.
Ickriluyun rokeem. PAG / DE.

Internetxo : www.europalingua.eu/KotavusaVirda

Bu : www.europalingua.eu/KotavusaVirda/15-e_otuk_01-2024

Sanegara : Taneaksat ke 2024. 15^e otuk.

Yunkexa is ewava : ewaveem abugaf gu roka ok
nuyon rotamuzen ok rictayan gan digisik.

3

Loma
WERDDUNOL

SULEM

FR
chameau

Wegidol



Werdtoraf moukdunol sodis va tanoy ok
toloy sumralk is saven wetce lakis is bures
bonol koe lindafa gola ke Asia. Tanralkaf
wegidol sotir cwol, moekote blis koe Afrika
is Araba.

fuzol - jaftol - **wegidol** - okol - putcol - namulol

Wegidol is Zeus

Wegidol, rabateson da jaftolye va int gu noleem abdivodar, djumar nume dere lion roseotar.
Batdume va Zeus kevlanir aze blikar da in va noleem di kozilir. Voxen Zeus, pan da in va int
gu ontinaltopo is po me keldaskir ise ware loon galper, osk va lopekura va noleem vewar,
voxosk va toloyi oblakaki dace gaber.

Batinde jontiktan warkon is djumason va artan disuked, me vofad da va intaf gunteem
drasud.

Kuda ke Aisopos, -VI^{eafa} decemda (kalkotavaks gan Yurani Andergan)